


# ILAY SORA-TÀNANA

## EO AMIN'NY RINDRINA

 Tsara tokoa ny tonga, izao maraina izao, eo amin'ity sabata ity. Andro ratsy iray ilay izy, saingy, kanefa, sabata iray ho an'ny fanahintsika foana izany rehefa mieritreritra ny Tompo sy ny Fahatsarany isika.

<sup>2</sup> Ary ankehitriny dia nilaza aho, androany, fa raha sitraky ny Tompo, dia maniry aho ny hitory an'ity Hafatry ny maraina ity, satria ny rahalahintsika . . . ny fanajan'ny famelàna ahy hanana ny—ny fotoana izao maraina izao, ary hiresaka isika izao maraina izao eo amin' *Ilay Sora-tànana Eo Amin'Ny Rindrina*.

<sup>3</sup> Ary, rahariva, raha sitraky ny Tompo, dia tiako ny hiresaka eo amin'ny lohahevitra hoe, *Handeha Alohan'Ny Vanim-potoan'Ny Fahoriambe Lehibe Ve Ilay Fiangonana?* Ary ho tiako, raha tsy manana toerana iray ianareo izay—izay tianareo, handehanana any am-piangonana androany, na rahariva, ny hahatongavanareo rahariva ho an'ny hafatra hoe, *Handeha Alohan'Ny Vanim-potoan'Ny Fahoriambe Ve Ilay Fiangonana?* Ary izaho . . . Tena misy adi-hevitra iray ny amin'izany, na hoe ilay—ilay Fiangonana dia tsy handeha na tsia amin'izany fotoana izany, noho izany dia te-hiresaka an'izany isika rahariva.

<sup>4</sup> Ary ankehitriny dia nilaza aho, tao amin'ny radio, omaly, ny Rahalahy Neville malalantsika no nilaza, hoe izao maraina izao, raha nisy hivavahana, dia mba ho eto amin'ny valo ora. Ary teto ny zanakolahy mba hizara karatra, ary tsy nisy anankiray, mihitsy. Tamin'ny sivy ora, dia nisy olona anankiray fotsiny no nivavahana.

<sup>5</sup> Ankehitriny, izao hariva izao, ireo fot- . . . na karatra, ireo karatra fangataham-bavaka, dia ho zaraina. Faly aho mandre an'izany. Faly aho ny mahita fa miomana ho an'ny olona marary anankiray izy ireo, izay hivavahako. Fa nisy . . . Ireo fotoana rahariva . . . Hia, angamba maraina ratsy iray ilay izy, ka tsy nivoaka ny olona. Noho izany, rahariva, hizara an'ireo karatra fangataham-bavaka izy ireo amin'ny enina sy sasany rahariva, amin'izy ireo. Raha . . . Isika—afaka miteny amin'ny alàlan'izany isika, arak'izany, hoe ahoana no hanaovako fototra ny hafatro, na ho an'ny fanasitranana avy amin'Andriamanitra izany na inona, eo . . . na hanova ny lohahevitra ho amin'ny fomba fanasitranana avy amin'Andriamanitra, na raha ho an'ny famonjena fanahy fotsiny ilay izy.

Ankehitriny dia ndao isika hanondrika ny lohantsika vetivety fotsiny, ao amin'ny vavaka.

<sup>6</sup> O Andriamanitra, Ray marina indrindra, tena faly izahay izao maraina izao, raha miditra ao amin'ny Toera-masinao, mba hiandrindra mankany amin'ireo lanitra, hahita hoe lehibe toy ny ahoana Ianao, araka ny vao avy nohirain'ilay rahalahy fotoana vitsy lasa izay. Ary ny mahita Anao mamelatra an'ireo Elatrao lehibe avy any amin'ny lanitra mankany amin'ny lanitra, tahaka ny nitondran'ilay renim-boromahery an'ireo zanany kely avy tao amin'ilay akany. Ary alohan'ny hakany azy ireo avy ao amin'ilay akany, dia mamelatra an'ireo elany lehibe fotsiny izy, ary namela an'ireo ankizy kely hahita hoe lehibe toy ny ahoana izy, ary mahery toy ny ahoana. Amin'izay fotoana izay dia afaka matoky an'ireo elany izy ireo, satria manao ny fanidinany voalohany avy ao amin'ny akaniny izy ireo.

<sup>7</sup> Tompo Andriamanitra, androany, dia tena faly izahay fa afaka miandrindra ka mahita an'ireo kintana eny amin'ny lanitra, sy ny—sy ny volana, ary ilay fihodin'ny masoandro lehibe raha mihodina ao anatin'ny tena firindrana tanteraka izany, avy eo dia hitanay hoe lehibe toy ny ahoana Ianao. Ary raha tonga ny fotoana hialanay amin'ity akanin'izao tontolo izao ity, dia manana fahatokiana izahay ny mahafantatra fa Izy Izay nametraka an'ireo kintana teo amin'ireo lalany, Izay nanao ny lanitra sy ny tany, dia afaka mitari-dàlana tokoa ny fanahinay tsy manan-kery ho ao amin'ny toerana iray izay Nampanantenainy, satria afaka mahita izahay hoe lehibe toy ny ahoana Ianao.

<sup>8</sup> Ary satria tsapanay fa miaina ao amin'ny andro farany izahay, mialoha indrindra ny Fihavian'ilay Zanakao mahafanaritra, io Mpanonjy malala tiana io, dia mivavaka izahay, androany, mba Hampahatsiahivanao anay hoe akaiky toy ny ahoana izany, io zava-mitranga lehibe io. Ary enga anie ny fanahy tsirairay ato hanala fotsiny ny fisainana hafa tsirairay amin'ity fotoana ity. Ary, Ray, mivavaka izahay mba Hiresahanao aminay amin'ny alàlan'Ny Teninao, androany, mba ahafahanay mahita, amin'ny alàlan'ny fahendren'ireo mpaminany tamin'ireo andro lasa, hoe akaiky toy ny ahoana fotsiny ny Fihavian'ny Tompo.

<sup>9</sup> Rehefa mamaky ny gazetina izahay, ary mandre an'ireo radio, dia fantatray fa misy zavatra tsy mety ao. Ary ny fanahinay dia miteny aminay fa misy zavatra izay tsy mety tanteraka.

<sup>10</sup> Ary omeo anay androany izay ilainay. Vonjeo, Tompo, ireo izay azo vonjena androany. Ary sitrano ireo izay mila fanasitranana androany. Ary mivavaka izahay mba Hanokafanao ny sofinay handre Ny Teninao. Sokafy ny vavan'ny Mpanomponao ka teneno ankehitriny ireo zavatra izay mety ho an'Ny Fiangonanao amin'ity ora ity. Fa mangataka an'izany amin'ny Anaran'Ny Zanakao tia izahay, ny Tompo Jesosy. Amena.

<sup>11</sup> Ao amin'ny Testamenta Taloha, ao amin'ny Bokin'i Daniela, ny toko faha-5 ary ny andininy faha-25, no iriako ho vakiana. Ary ianareo izay mandray naoty ny Soratrareo. Ary ankehitriny dia miala tsiny izahay fa tsy manana efitra misy seza ho an'ireo izay mitsangana. Tiako ny hamaky manomboka amin'ny andininy faha-25. Ary enga anie ny Tompo hanampy ny Fitahiany.

*Ary izao no dikany izay voasoratra hoe, MENE, MENE, TEKELA, OPARESINA.*

<sup>12</sup> Satria ireo Soratsika, izao maraina izao, dia mitondra antsika miverina ao amin'ny Testamenta Taloha, mba hampifototra ny fisainantsika mandritry ny minitra vitsy manaraka eo amin'ny zava-mitranga ara-tantara iray. Ary fantatsika fa ny tantara dia mamerina ny tenany mazàna. Ary ao amin'ny biraoko ankehitriny, mianatra an'ireo *Ante-Nicene Fathers* aho, ary afaka mahita amin'ny alàlan'ny Soratra, hoe ahoana fa mamerina indray an'ilay taona izay efa lasa isika.

<sup>13</sup> “Ary ny Soratra rehetra dia nomena tamin'ny alàlan'ny tsindrimandry.” Ary ny Tompontsika finaritra no nilaza, hoe, “Tsy azo foanana ny Soratra. Tsy maintsy tanteraka ny Soratra rehetra.” Fiononana iray toy ny inona izany, homena antsika olona izay mamaky an'ireo Soratra ireo, mahafantatra fa izay novakiansika dia tsy azo foanana. Manome antsika an'ilay fototra mafy indrindra hampitsaharana ny finoantsika izany. Ary tsy maintsy tanteraka ny Soratra tsirairay.

<sup>14</sup> Avy eo dia hitantsika, fa ao amin'ny fahatanterahan'ireo Soratra, dia lehibe loatra ilay Teny hany ka matetika Izy no manana fanatanterahana roa, ary ny ankamaroan'Izany rehetra izany dia miverina indray mandeha farafahakeliny.

<sup>15</sup> Ohatra, ao amin'ny Baiboly, ao amin'ny Matio ny toko faha-2, Izany—Izany dia mivaky, eo amin'izay Nilazany hoe, “Avy tany Egypta no Niantsoako ny zanako.” Raha hamaky an'io Soratra io ianareo, ka mijery an'ilay fanondroana, dia ho hitanareo indray izany, fa Andriamanitra dia niantso ny Zanany, Jakoba, avy tany Isiraely. . . avy tany Egypta. Ary avy eo dia tanteraka indray koa izany rehefa niantso Ny Zanany Izy, Jesosy, avy tany Egypta.

Ary manohy mamerina ny tenany fotsiny Izany, satria voatsindrimandry Izany.

<sup>16</sup> Raha nanoratra taratasy iray ho anareo aho, dia ho nankasitraka an'izany taratasy izany angamba ianareo. Ary raha nanoratra anankiray ho ahy ianareo, dia azoko antoka fa hankasitraka an'izany aho. Saingy ho anareo fotsiny ny taratasiko. Noho izany, rehefa avy mamaky azy indray mandeha ianareo, dia fantatrareo ny dikany rehetra, ary tsy ho ilaina intsony ilay taratasy, ho an'ny olon-kafa iray. Voatokana ho anareo fotsiny izy; na ny anareo ho ahy.

<sup>17</sup> Saingy tsy tahaka an'izany ilay izy amin'ny Tenin'Andriamanitra Mandrakizay. Voatsindrimandry Izany. Noho izany, dia ho an'ny olona rehetra Izany, ao amin'ny taona rehetra, ary hiatrika ny toe-javatra rehetra. Izany no manao Azy hamerina ny Tenany hatrany. Arakaraky ny hivoaran'ny tantara, no Hivoarany miaraka amin'ny tantara. Ary tsy mahavery ny Teti-bidiny mihitsy Izy, satria Izany no Teny Mandrakizay an'ilay Andriamanitra Mandrakizay. Tsy afaka mahavery ny Teti-bidiny Izy.

<sup>18</sup> Ary ny sehatsika izao maraina izao dia ao Babylona. Tena tsara ho antsika ny mahafantatra kely mikasika an'ity tanàna lehibe ity. Ary efa nianatra aho vao haingana mikasika an'i Babylona, avy tao amin'ny—ny... ara-jeografia hoe aiza no itoerany. Ary nianatra an'izany avy tao amin'ny *Two Babylons* an'i Hislop aho, iray amin'ireo tantara tranainy indrindra an'i Babylona.

<sup>19</sup> Miseho voalohany i Babylona ao amin'ny fiandohan'ny Baiboly, avy eo dia miseho izy ao afovoan'ny Baiboly, ary avy eo dia miseho izy ao amin'ny faran'ny Baiboly. Ny antony anombohany ao amin'ny Genesisy dia satria Genesisy no tokon'ny voa an'ny Baiboly. Teo no nisy ny voan'ny zavatra rehetra izay eto ambonin'ny tany, androany, izay nanomboka, tao Babylona . . . tao amin'ny Genesisy. Mamelà ahy. Ary Babylona dia nanomboka tao amin'ny Genesisy.

<sup>20</sup> Izy dia naorin'i Nimroda aloha, izay zanak'i Hama. Ary izy dia nantsoina aloha hoe, "Ireo vavahadin'ny Paradisa." Avy eo izy dia nantsoina hoe Babylona, ary ny teny hoe Babylona dia midika hoe, "Niverin-dàlana."

<sup>21</sup> Ary Nimroda no nanorina an'io tao amin'ny anankiray tamin'ireo ampahany lonaka indrindra an'izao tontolo izao fantatra. Ary tanàna malaza iray izy. Ary naorina tao amin'ireo lohasahan'i Sinara izy. Ary Sinara dia . . . Ny lohasahan'i Sinara no toerana lonaka indrindra eto amin'izao tontolo izao fantatra, foiben'ny fambolena lehibe iray, ary ilay Renirano Eofrata lehibe no nanondraka ny taniny. Ilay Tigrisy dia nipetraka tany avaratra, teny an-tendrombohitra, fa ny Eofrata no nanondraka an'i Sinara. Ary teo afovoan'io lohasaha io mihitsy, no naorina ity tanàna lehibe ity, ary izy no anankiray amin'ireo tanàna lehibe indrindra an'ilay andro. Toerana mahery iray izany, ary feno siantifika sy ny fahaizan'izao tontolo izao fantatra izy.

<sup>22</sup> Ilay tanàna dia roapolo amby zato mailly nanodidina azy, mba haka an'ilay tanàna. Ary ireo rindrina dia teo amin'ny roanjato dian-tongotra ny velarany, ary saiky telonjato dian-tongotra ny haavony. Afaka mampihazakazaka kalesy enina ianareo, mifanila, nanodidina an'io rindrina io, ary hazakazaka nanodidina ny rindrina.

<sup>23</sup> Ary avy eo ilay tanàna, ihany koa, dia nanana tao anatin'ny, làlambe lehibe, goavambe. Ary ireo làlambe ireo dia saiky nitovy, na mihoatra noho ny mitovy, amin'ireo làlambe moderin'izao andro izao. Teo amin'ny roanjato dian-tongotra teo ny sakany. Hafahafa daholo izany ho an'ny tanàna iray tamin'ireo andro ireo, satria tery ireo làlambe, mba handehanan'ny kalesy kely iray fotsiny.

<sup>24</sup> Fotoana vitsy lasa izay, dia tombontsoa ho ahy ny tany Oslo, Norvezy. Ary any amin'ny ampahany tranain'ilay tanàna, izay mihoatra ny arivo taona tsara mihitsy, dia zara ianareo raha afaka hamily fiara manerana an'ireo làlamben'ny tanàna, satria ny fitaterana tokana nananan'izy ireo dia kalesy na mpitaingin-tsoavaly. Ary tahaka an'izany no nanorenana an'ireo tanàna fahiny rehetra. Fa ity Babylona ity dia nanana làlambe roanjato dian-tongotra. Ireo tafika dia afaka nandeha nitafy fitaovampiadiana feno, sy nifanila avokoa, ary roanjato dian-tongotra ny velarany, kalesy sy kalesy.

<sup>25</sup> Ary izy dia voarina zavatra iray tahaka an'i Roma, amin'izao andro izao, izay ipetrahan'i Babylona moderina. Ny làlambe rehetra dia nitarika nankeo amin'ilay lapabe sy ilay seza fiandrianana, ny tiako lazaina, dia ilay seza fiandrianana. Ilay seza fiandrianana dia toerana lehibe iray eo afovoan'ny tanàna. Ary teo anoloan'ilay seza fiandrianana, no nikoriana ilay renirano lehibe Eofrata.

<sup>26</sup> Ary ireo vavahady lehibe an'ity tanàna ity, roanjato dian-tongotra ny velarany, ary dimampolo amby zato na roanjato dian-tongotra ny haavony, dia vita tamin'ny varahina mafy.

<sup>27</sup> Oh, tanàna goavambe iray izy! Ary nanerana an'ireo rindriny rehetra, dia nanana saha mihantona lehibe izy. Ary ireo saha ireo dia toerana lehibe an'ny fialam-boly.

<sup>28</sup> Ary tao an-tanàna dia nanapa-kevitra izy ireo fa afaka miaina saiky amin'ny fomba rehetra izay tiany iainana. Noho izany dia nieritreritra izy ireo, tamin'izany, fa raha afaka nanao an'izany izy ireo, dia hanorina tilikambo iray tena avo, ka raha hany tonga ireo ranon'ny fitsarana, dia hiakatra eo amin'ilay tilikambo fotsiny izy ireo, ary ho voaaro.

<sup>29</sup> Hitanareo ve? Sary iray an'i Amerika moderina fotsiny izany, miezaka ny hahazo sambon-danitra iray na zavatra iray, ary mandeha eny amin'ny volana, mihevitra fa ho voaaro isika. Fa mahita anareo Andriamanitra, tsy mampaninona izay misy anareo.

<sup>30</sup> Ary tao amin'ity tanàna ity, dia nanana an'ireo karazana fitaovam-pahotana rehetra izy ireo. Ary rehefa ny toerana rehetra no mihevitra ny tenany ho voaaro, amin'izay fotoana izay dia miditra ny herisetra sy ny ratsy. Nanana an'ireo siantifika tsara indrindra teto amin'izao tontolo izao izy ireo. Nanana an'ireo tafika tsara indrindra teto amin'izao tontolo izao izy ireo.

Nanana an'ireo kalesy tsara indrindra teto amin'izao tontolo izao izy ireo, ireo lehilahy tsara hofana indrindra izay nisy. Ary ireo siantifika, sy ny fiadiana rehetra, dia faratampony izy ireo. Ambony lavitra noho ny sisa rehetra tamin'ireo firenena izy ireo. Ary izy ireo, marina tokoa, ny sisa tamin'ireo firenena dia somary niandrindra nankany amin'izy ireo, na niondrika tamin'izy ireo.

<sup>31</sup> Ary rehefa tafiditra ao amin'izany toerana izany ny firenena iray, amin'izay fotoana izay dia mihevitra izy ireo fa afaka manao izay tiany hatao fotsiny, ary hilamindamina amin'izany.

<sup>32</sup> Fa, tsarovy, tsy mampaninona na avo toy ny ahoana aza ireo rindrina, Andriamanitra dia mijery midina avy any An-danitra. Ary halan'Andriamanitra ny fahotana. Tiany ilay mpanota, saingy Halany ireo asany, ny fahotana.

<sup>33</sup> Ary tao amin'ity tanàna lehibe ity, dia lasa tena ratsy fanahy izy ireo. Nieritreritra izy ireo hoe, “Eny, afaka manao ny zavatra rehetra izay tianay hatao fotsiny izahay, satria tsy misy na inona na inona afaka hanelingelina anay.” Raha tsy saiky izany mihitsy no sarin'ny firenentsika, amin'izao andro izao, mandà an'Andriamanitra fotsiny!

<sup>34</sup> Ankehitriny, izy ireo dia nandà ny famindrampom'Andriamanitra, ihany koa tany. Nanana mpaminany iray izy ireo tao amin'io tanàna io tamin'ny anarana hoe Daniela. Ary azonareo eritreretina ny lehilahin'Andriamanitra iray, nahita ny fahotana sy ireo fitaovam-pahotana, mba ilazana azy, niantsoantso nanohitra an'izany izy. Fa nihomehy azy fotsiny izy ireo, toy ny mieritreritra hoe, “Tsy mahafantatara an'izay resahany io lehilahy antitra io.”

<sup>35</sup> Ary toy izany koa ilay izy amin'izao andro izao, hoe ny vahoakantsika amin'ity andro ity dia lasa tena tsy liana ny amin'Andriamanitra, hany ka tsapantsika fa afaka miaina fotsiny amin'ny fomba rehetra izay tiantsika iainana isika ary milamindamina amin'izany. Saingy tsy afaka manao an'izany ianareo. Tsy afaka hahavita an'izany mihitsy ianareo. Andriamanitra no hitsara ny fahotana.

<sup>36</sup> Nilaza tamiko ny olona iray, fotoana vitsy lasa izay, nanao hoe, “Ry mpitory teny, ny fototsika an'i Amerika dia niorina teo ambonin'ny—ny fanajana sy ny fankatoavana an'ireo razambentsika. Lehilahy mpivavaka izy ireo, noho izany dia hiaro an'ity firenena ity mandrakizay Andriamanitra.”

<sup>37</sup> Tsy hanaja antsika mihoatra noho ny Nataony tamin'ny Isiraely Izy. Isiraely no Olony nantsoina sy nofidiany. Ary rehefa namafy izy ireo, dia nijinja an'izay nafafiny. Ary ho an'ny isambatan'olona izany. Tsy mampaninona na masina toy ny ahoana aza ny fiangonana iray izay ihamboantsika fa ikambanana, na tsara toy ny ahoana no ezahantsika iainana, voaterin'Ny Teniny Andriamanitra, mba hitsara antsika arak'izay Nolzainy.

<sup>38</sup> Ary nanao an'ity filazana ity aho. Raha afa-mandositra amin'ny fitsarana ity firenena ity, dia ho voatery hanangana an'i Sodoma sy Gomora Andriamanitra, ka hiala tsiny nohon'ny nandentehana azy ireo sy nandoroana azy ireo, satria ratsy fanahy tahaka an'i Sodoma sy Gomora mihitsy isika. Ary raha nandentika an'i Sodoma sy Gomora Izy, ka nandoro azy ireo, nohon'ny fahotan'izy ireo, nefa tsy mifanaraka amintsika amin'ilay fomba iray ihany Izy, amin'izay fotoana izay dia ho tsy marina Izy ary hananan'izy ireo fialan-tsiny iray.

<sup>39</sup> Tsy mila miala tsiny amin'iza na iza Andriamanitra, na inona na inona. Hotsaraina ny fahotana. Ary ho saziana izany, azo antoka mihitsy tahaka ny isian'ny Andriamanitra iray Izay afaka manao fitsarana. Ary masina ny fitsaran'Andriamanitra. Masina Andriamanitra. Ary, noho izany, ireo Fitsarany sy ireo Asany dia tsy maintsy marina sy masina, satria lasa Andriamanitra masina iray izany, ho an'ireo Asany sy ny Fitsarany.

<sup>40</sup> Ary, oh, toy ny ahoana ity tanàna ity, niroboka tao anatin'ny fahotana! Toy ny ahoana ny firenentsika, androany, miroboka ao anatin'ny fahotana! Mihevitra fotsiny isika hoe satria Presbyterana isika, na Batista, na Pentekotista, na zavatra iray, dia izay ihany no takian'Andriamanitra. Mitaky fahamarinana Izy. Ary izany no zavatra tokana izay tian'ny Lalàny ho fanta-...ho ekena, dia ny fahamarinana. Tsy manavaka anaram-piangonana Izy.

<sup>41</sup> Ao amin'ny Bokin'ny Asa, ny toko faha-10 ary ny andininy faha-35, dia hoy ilay mpaminany hoe, "Hitako fa tsy manavaka firenena na olona Andriamanitra, fa hanaiky an'izay hanompo Azy amin'ny fahamarinana." Tsy mampaninona izay fiangonana ikambananareo, manantena anareo hanaja Azy Andriamanitra. Ary Tiany hanompo Azy amin'ny fahamarinana ianareo. Raha diso amin'ny fitondrana ny Filazantsara amin'izy ireo isika, amin'izay fotoana izay Andriamanitra dia hitsara azy ireo araka ny fahalalana izay nananan'izy ireo, ary toy ny ahoana no nanajan'izy ireo an'Izany.

<sup>42</sup> Oh, isaorana anie Ny Anarany! Arak'izay azonareo tsapaina fotsiny ihany, ao amin'izao andro izay iainantsika izao, dia misy zavatra efa hitranga mihitsy. Oh, miandry amin'ny fiandrasana lehibe an'ny maraina be voninahitra iray aho, izay hifaranan'ireo olana rehetra, ka hahatongavan'ilay Tompo isaorana. Ary hakarina isika, hitsena Azy eny amin'ny habakabaka. Oh, izany no tokony ho tena antony an'ny fo tsirairay mihitsy, sy ny tena tanjon'ny fo tsirairay, ny miandry an'izany fotoana izany, hahita hoe rahoviana no hifarana ireo olantsika sy fizahan-toetrantsika. Ary rehefa . . .

<sup>43</sup> Atodiho ny fisainantsika ankehitriny mankany Babylona, indray, mba hanohy ny Hafatsika. Hitantsika, tao amin'io tanàna lehibe io, fa rehefa voaaro tanteraka izy ireo, dia tsy

nisy firenena afaka nahazo azy ireo. Nahoana, nanana rindrina roanjato dian-tongotra hangadiana izy ireo, an-jatony dian-tongotra ny haavony teny amin'ny habakabaka, ary vavahady varahina lehibe izay hila andiana miaramila hanokatra. Voaisy manda tsara izy ireo. Tsy nila nanahy mikasika ny firenena hafa iray izy ireo. Ankehitriny, nety tsara io ampahany io. Fa rehefa mampiditra ny fahotana ao izy ireo, amin'izay fotoana izay, tsarovy, dia afaka mijery na aiza na aiza Andriamanitra ary mahita anareo, tsy mampaninona na voaisy manda toy ny ahoana aza ianareo.

<sup>44</sup> Ary tiako ny hilaza an'izao. Fomba tokana ihany no hahavoaisy manda ny Kristiana, izany dia, eo ambanin'ny Ràn'ilay Zanak'Andriamanitra velona. Izany no zavatra anankiray izay tsy Azony hijerena sy hitsarana. Raha voasaron'ny Rà ianareo, amin'izay fotoana izay dia tsy hahita anareo Andriamanitra. Hoy Izy, ao amin'ny Soratra hoe, "Rehefa mahita ny rà Aho, dia handalo Aho. Handalo anareo Aho."

<sup>45</sup> Fa ireto olona ireto dia tsy liana mikasika an'izany. Nanana ny fivavahany manokana izy ireo, noho izany dia niaina tamin'ny alàlan'ireo izy ireo. Fantatrareo, "Misy làlana izay toy ny mahitsy amin'ny olona, saingy làlan'ny fahafatesana no iafarany."

<sup>46</sup> Ankehitriny, tao amin'ity tanàna ity, dia nanana mpanjaka iray izy ireo izay anankiray amin'ireo zazalahy mpihaniany moderina ireo, oh, zavatra tahaka ny sasany amin'ireo mpanao hatsikan'ny radio antsika, Arthur Godfrey moderina, na Elvis Presley iray, na olona iray tahaka an'izany. Oh, izy dia zazalahy iray nalaza, an'ny fotoana goavana. Ary tiany ireo fotoany goavana, noho izany dia nandeha nanomana fetin'ny rock-and-roll kely iray ho an'ny olony rehetra izy.

<sup>47</sup> Oh, raha tsy efa ozona iray izany! Ary ny mieritreritra fa ireo lehilahy sy vehivavy, izay miantso ny tenany ho mpanompon'i Kristy, dia miroboka ao amin'izany karazan-javatra izany, ireo diska ao an-tranon'izy ireo, eo amin'ireo miliny. Ario any ivelan'ny varavarana ireo zavatra!

<sup>48</sup> Dia nieritreritra ity lehilahy ity hoe, "Eny, ankehitriny, hanana fotoana iray goavana be fotsiny isika." Ary nandefa fanasana lehibe iray ho an'ny olo-malaza rehetra izy. Nifidy an'ireo voafidiny izy, ireo izay afaka nandihy tamin'ny tsara indrindra, sy ireo vehivavy izay tsara tarehy indrindra. Ary nentiny tao amin'ny saha mihantona goavana be iray izy rehetra, tao ambadik'ilay lapa mihitsy, ho an'ny dihy moderina iray. Ary hanana fahafinaretana betsaka izy ireo. Ary ireo miaramila rehetra, sy izy rehetra ireo, dia lasa mamom tsara. Raha tsy izany no Amerika moderina, dia tsy fantatro hoe aiza no misy azy. Noho izany dia nanana fotoana iray lehibe izy

ireo. Ary mandrehitra ny girilandy rehetra izy ireo, tahaka ny fampisehoana tsara iray an'ny televiziona fotsiny.

<sup>49</sup> Ary tao ambadika tao izy ireo, ireo vehivavy, tsy isalasalana, niaraka tamin'ny mpitaiza zaza tany an-trano, nikarakara an'ireo zazakeliny. Ary hoy ny Baiboly hoe, “Niantso an'ireo vaditsindrano rehetra izy.” Ary ny *vaditsindrano* dia “mpivarotena” ara-dalàna iray. Ary ny fahasamihafana tokana dia, amin'izao andro izao, mbola ilay zavatra iray ihany foana izy ireo, saingy tsy ara-dalàna. Ary navelan'izy ireo tany an-trano ireo zazakeliny niaraka tamin'ny mpitaiza zaza, ary nanao an'ireo akanjony vaovao, moderina izy ireo, ireo zipo keliny sy ny sisa. Ary nandeha nankany amin'ilay fetin'ny mpanjaka izy ireo, na fetin'ny rock-and-roll.

<sup>50</sup> Oh, tsy afaka mahita an'i Amerika ao amin'io toerana iray io ihany ve ianareo? “Oh, ilay mpanjaka no nanohana an'izany, noho izany dia tsy maintsy mety tsara izany. Raha ilay mpanjaka no manao an'ilay izy, eny, dia milamina hatreo izany.” Eny, satria fotsiny hoe Amerika no mamela anareo hivarotra whisky, sigara, sy paraky, ary labiera, tsy manao an'ilay izy ho marina izany, eo imason'Andriamanitra. Hitsara ny fahotana Andriamanitra. Hoy ianareo hoe, “Eny, ny firenentsika dia mivarotra azy.” Fa tokony hanana an'ilay tena fitsipiky ny lehilahy sy vehivavy ianareo, ary miala lavitra an'izany. Ny firenentsika dia fehezin'ny devoly, tahaka an'ireo firenena hafa rehetra. Ny Baiboly no milaza fa izany izy ireo. Noho izany dia tsy afaka miantehitra amin'ny fomba izay—izay itondrana ny firenena ianareo.

<sup>51</sup> Hoy Satana hoe, “Ahy ireo fanjakana rehetra ireo. Hataoko amin'izy ireo izay tiako hatao.” Dia hoy izy tamin'i Jesosy hoe, “Homeko Anao izy ireo raha hiankohoka amiko Ianao.”

<sup>52</sup> Fantatr'i Jesosy fa Izy no handova azy ireo, ao amin'ny Arivo taona, noho izany dia hoy Izy hoe, “Voasoratra hoe, ‘Ny Tompo Andriamanitrao no hiankohofanao, ary Izy irery ihany no ho tompoinao.’” Toriteny tsara ho an'ny fiangonana izany, mainka fa ho an'i Satana. Tsy mampaninona izay anananareo, nodidiana isika hanompo an'ilay Tompo Andriamanitsika, ary Izy irery ihany no hotompointsika.

<sup>53</sup> Noho izany dia nanomana ny sakafo hariva lehibe ilay mpanjaka. Ary nataony vonona ny sakafo rehetra, sy ny labieran'izy ireo tsara indrindra, ary ny divain'izy ireo. Ny dokam-barotra tsara indrindra, dia nananan'izy ireo. Ary nanana fotoana iray goavana be izy. Ary nanasa an'ireo zazavavin'i Hollywood rehetra izy, sy izy rehetra. Ary tonga izy rehetra, sy ireo mpandihy tsara indrindra izay nananan'izy ireo. Tao amin'io saha goavana tany io izy rehetra, nanana rock-and-roll moderina iray ho an'ny tenany. Fotoana iray toy ny inona! Mandihy, misotro, mifaly!

54 Tsy milaza ve ny Baiboly fa ho tahaka an'izany izy ireo? Hoy Izy, “Ho kirina izy ireo, mpieboebo, tia ny fahafinaretana mihoatra noho ny fitiavana an'Andriamanitra; mpanontolo fo, tsy mahonom-po, lozabe, ary tsy tia an'ireo izay tsara amin'Andriamanitra.” Andro iray toy ny inona no iainantsika! Ankehitriny dia tiako ianareo hanongo ny fieritreretanareo arapanahy.

55 Tao amin'ity fotoana ity, raha mbola nanana an'io rehetra io izy ireo, ary ny . . . Toa hitako mihitsy ireo—ireo ramatoa tanora miaraka amin'ny labierany, misotro. Ary izy ireo dia nanao ny—ny rock-and-roll-ny, na boogie-woogie, nanana fotoana goavana iray fotsiny tany, nandihy manerana. Ary nampisavilivily an'ireo vehivavy ireo miaramila mamona ireo, ary nisintona azy ireo nankeo amin'izy ireo, ka nametraka azy ireo teo amin'ny lohaliny. “Ary nanana fialam-boly kely iray madio fotsiny izy ireo.” Izany no iantsoan'i Amerika azy amin'izao andro izao hoe, “Fialam-boly kely iray madio fotsiny.” Fahotana izany!

56 Hoy ny Baiboly hoe, “Izay miaina amin'ny fahafinaretana dia maty fahavelona izy.” Ary ny fomba nahaverezan'ireo vehivavintsika Amerikana ny fitondran-tenany, hany izy ireo ka zara raha mahafantatra ny dikan'ny teny hoe *fitondran-tena*.

57 Ary nanenjika azy ireo aho, mikasika an'izany, vao tsy ela akory izay. Ary nilaza tamiko ny vehivavy iray. . . Niteny taminy aho. Hoy aho hoe, “Raha manao an'ireny akanjo ireny amin'ny fomba anaovanao azy ianao, dia tsy maintsy hamaly ianao amin'ny Andron'ny Fitsarana nohon'ny fijangajangana.” Vehivavy iray nanambady izy.

58 Hoy izy hoe, “Homeko mba hahazoanao, Ranadahy Branham, fa tsy mbola nanao zavatra ratsy mihitsy aho.”

59 Hoy aho hoe, “Fa ilay lehilahy hafa izay nijery anao ve no nanao zavatra ratsy? Satria hoy Jesosy hoe, ‘Na iza na iza mijery vehivavy iray mba hitsiriritra azy, dia efa nijangajanga taminy sahady tao am-pony.’ Amin'izay fotoana izay rehefa mamaly nohon'ny fijangajangana io mpanota io, dia hamaly tahaka ny meloka iray ianao, satria nampiseho ny tenanao taminy tao amin'io fitafy io.”

60 Hoy ianareo, “Eny, Ranadahy Branham, mivarotra an'ireo karazana akanjo ireo izy ireo. Io ihany no karazana tokana amidin'izy ireo.”

61 Mbola mivarotra milina fanjairana foana izy ireo. Mbola manana lamba foana izy ireo. Henatra iray ny mahita an'ilay fanao, ireo vehivavintsika amin'izao andro izao. Ianareo vehivavy Pentekotista, fahafaham-baraka iray toy ny inona!

62 Ary ianareo lehilahy, ianareo lehilahy Pentekotista, izay hamela ny vehivavinareo hihetsika tahaka an'izany, izany no maneho hoe lehilahy toy ny ahoana marina tokoa ianareo.

Ianareo no natao ho lohan'ny tokantrano. Oh, fahafaham-baraka iray toy ny inona!

<sup>63</sup> Hoy ianareo, eny, mifoka sigara ny vadinareo. Inona no nampiditra azy tao amin'izany tany amin'ny voalohany? Diso izy manao an'izany. Manapoizina ny tenany izy. Manapoizina ny zanakareo izy. Manozona an'ilay fianakaviana manontolo izy. Ary fahafaham-baraka iray ho an'ilay Fiangonan'Andriamanitra velona!

<sup>64</sup> Ary ianareo izay mamela ny zanakareo, ireo zazavavy tanoranareo, mivoaka miaraka amin'ireto zazalahy izay mivoaka eto any amin'ireo fahadalana rock-and-roll moderina. Mbà menatra ianareo, ry neny sy dada! Hoy ianareo hoe, “Eny, manao izay tiany hatao fotsiny izy ireo.” Mbola manana an'ireo fikapohana foana ianareo.

<sup>65</sup> Manana roa aho any. Tsy fantatro hoe ho inona izy ireo. Fa raha ity lehilahy antitra ity, Branham, no velona ela be ka mihazona ny sainy tsara, mety handeha izy ireo saingy ho feno vay rehefa any izy ireo.

<sup>66</sup> Fahafaham-baraka iray izany! Betsaka ireo zazasary teraka eto amin'izao tontolo izao amin'izao andro izao, eto Amerika. Isan-taona ilay izy dia mamokatra zazasary betsaka kokoa noho ny novokarin'ireo ady tao anatin'ny efa-taonan'ny famonoana. Oh, famantarana lehibe iray an'ny andro farany izany! Azo antoka fa izany ilay izy.

<sup>67</sup> Ankehitriny dia tiako ianareo hanamarika an'ity mpanjaka ity. Oh, lehilahy malaza iray izy. Oh, Arthur Godfrey tsara iray izy, niaraka tamin'ireo vazivazy malotony rehetra.

<sup>68</sup> Ary ianareo vehivavy mijanona any an-trano, raha tokony haka ny fotoanareo ho an'ireo fivoriam-bavaka amin'ny—amin'ny maraina, mivadika ho karilahy iray tahaka an'izany ianareo ary mihaino azy, nefa avy eo dia miantso ny tenanareo ho Kristiana. Inona no ataony afa-tsy ny mipetraka eo miaraka amin'ireo zazavavy ireo, sy ny sisa! Nahoana, izy no trosa goavana indrindra izay hany nananan'ity firenena ity. Oh, eny, “Tena Amerikana iray izy.” Raha miantso an'izany ho Amerikana ianareo, izany dia...Mety ho Amerikana tsara iray, saingy lavitra be amin'ny Kristianisma izany. Saingy tsy manam-potoana ho an'ny fivoriam-bavaka ianareo na hamaky ny Baiboly. Ankehitriny dia hitanareo ve hoe aiza no misy antsika?

<sup>69</sup> Ireo vehivavy ireo, ireo vaditsindrano izay tany ireo niaraka tamin'ilay mpanjaka tamin'io hariva io, raha nihaino an'i Daniela izy ireo, dia tsy ho tany.

<sup>70</sup> Fa mariho raha nitohy ilay fety, fantatrareo, ary lasa tena nafana tsara izy rehetra, niaraka tamin'ireo divay sy whisky tsaran'izy ireo ary labiera, izay nananan'izy ireo. Ary avy eo dia hoy izy ireo hoe, “Ndao isika hiala voly.” Oh, eny, io Arthur

Godfrey moderina io dia te-hanao vazivazy anankiray mikasika an'ilay mpitory teny sola loha, na zavatra iray, fantatrareo. Noho izany dia hoy izy hoe, "Handeha isika ka haka an'ireo fanaky ny tranon'ny Andriamanitr'izy ireo, ary hanao vazivazy kely iray fotsiny isika." Raha tsy izany no fampihomehezan'ny radio tsara iray na televiziona, dia tsy mbola nahita anankiray mihitsy aho.

<sup>71</sup> Hitanareo, maty ilay lehilahy, fa ilay fanahy mitohy velona. "Oh, isika dia hiteny anankiray fotsiny mikasika an'ity, itsy, na ny hafa, mba hanaovana fampihomehezana tsara iray." Reko izy ireo teto indray andro, teo amin'ny radio, nihira hoe *Rehefa Hiditra Ireo Olo-masina*, tamin'ny bàn-kira ragtime; *Rehefa Hitako Ny Rà*, tamin'ny bàn-kira boogie-woogie. Fahafahambaraka iray toy ny inona! Mihevitra ve ianareo fa afaka mihaino an'izany ny Andriamanitra masina iray, ary ho marina ka tsy mitsara an'izany?

<sup>72</sup> "Fa voaisy manda isika! Firenena lehibe iray isika. Isika no lehibe indrindra eto amin'izao tontolo izao!" Toy izany koa izy ireo. Saingy inona no niseho?

<sup>73</sup> Hoy izy, "Mandehana alaivo ireo fanaka ireo ka ndao isika hanana fotoana tsara iray." Dia nandeha izy ireo ka naka an'ireo fanaky ny Tompo, ireo zavatra masina.

<sup>74</sup> Fa, "Ianareo no fanaky ny Tompo." Ianareo no fanak'Andriamanitra, izay Androtsahany Ny Fanahiny Masina.

<sup>75</sup> Dia hoy izy ireo hoe, "Ndao isika hanao vazivazy vitsivitsy eo amin'izy ireo, ilay holy-roller." Noho izany dia mandeha izy ireo ary maka an'izany, ka mameno ny loviany, na ny . . . ireo zavatra, amin'ny—amin'ny divay. Ary avy eo io Arthur Godfrey moderina io, rehefa nipetraka teo amin'ny lohalik'ireo miaramila ireo zazavavy, ka nanao hoe "yoopii," ary nanana fotoana goavana iray, sy—sy ireo hanihaniny ary nanohy. Ary angamba vady lahy iray any an-trano, mitaiza zazakely; ary angamba ve—vehivavy iray any an-trano, mitaiza zazakely, nefa ny vady lahiny mamotany; saiky mitovy mihitsy.

<sup>76</sup> Ary teo izy ireo, nandritr'io fotoana goavana rehetra io, voaisy manda tsara, tsy nisy na inona na inona afaka nanelingelina azy ireo. Azo antoka! Ilay firenena malaza indrindra teto ambanin'ny lanitra, izany izy ireo. Ireo siantifika malaza rehetra dia tao amin'ny faritr'izy ireo. Ireo fitaovampiadiana lehibe rehetra dia teo ambanin'ny fifehezan'izy ireo. Tao ambadik'ireo rindrina izy ireo, noho izany dia tsy nisy na inona na inona afaka nanelingelina azy ireo. Nanana fotoana tsara iray izy ireo.

Tsy fantatr'izy ireo fa afaka nijery azy ireo Andriamanitra.

<sup>77</sup> Ary ao amin'izany, io mpanjaka moderina miaraka amin'ny vazivazin'i Elvis Presley io, ary nihira, nanana fotoana goavana iray angamba izy ireo. Noho izany dia hoy izy hoe, "Ento ireo holy-rollers ireo ka ndao isika hanao fialam-boly iray." Noho

izany dia nararany tao amin'ilay fanaka ny divay, ary nisotro an'izany izy, ka nanao hoe, "Oh, anankiray tsara ity!" Ny girilandy rehetra! Ary izy rehetra ireo, "Eny, tsara izany!"

<sup>78</sup> Tahaka an'i Amerika amin'izao andro izao mihitsy, miaraka amin'ny sasany amin'ireo fampihomehezana, sy ny sisa, izay ananan'izy ireo amin'ny televiziona sy radio. Ary ao amin'ireo moderiny... Ary ianareo olona izay miantso ny tenanareo ho Kristiana, izay mihaino karazan-javatra tahaka an'izany, ankehitriny dia afaka mahita ianareo hoe aiza isika no mitsangana. Ianareo Metodista, Batista, ary Presbyterana, ianareo Pentekotista tsara, nisy zavatra nitranga taminareo. Lasa ratsy ireo fanirianareo, satria izay ao am-ponareo no hataonareo. Ianareo tsy afaka hanao...

<sup>79</sup> Tsy ho fahagagana lehibe ho ahy, ny mahita kisoa iray eo amin'ny antontan-jezika iray, mihinana. Izany no natiorany. Fa azo antoka fa hahagaga ahy... Tsy nahita mihitsy aho, ary tsy hahita mihitsy, zanak'ondry iray mihinana miaraka aminy, satria hafa ny toetra ao anatiny.

<sup>80</sup> Tsy mahita Kristiana manao an'ireo zavatra ireo ianareo. Ny natioran'izy ireo, ny natioran'ilay Fanahy Masina lehibe, dia tsy hamela azy ireo hanao an'ireo zavatra ireo. Hoy ny Baiboly hoe, "Raha tia an'izao tontolo izao ianareo, na ireo zavatr'izao tontolo izao, dia tsy ao anatinareo akory aza ny fitiavana an'Andriamanitra." Ankehitriny dia afaka mitsara ny tenanareo ianareo, raha tsy izany dia ny Teny no mitsara anareo. Raha tia an'ireo zavatra ireo ianareo, dia niala taminareo ny fitiavana an'Andriamanitra.

<sup>81</sup> Andriamanitra no manana ny toerana voalohany na tsy manana toerana. Isaorana anie Ny Anarany! Tena faly aho ny amin'izany. Tena faly aho fa madio sy masina Izy. Afaka mametraka fahatokiana Aminy isika. Tsy manao marimaritra iraisana amin'ny inona na inona Izy. Andriamanitra Izy, ary Andriamanitra irery. Izany dia tsy... Tsy hidina hanatona antsika Izy; isika no tsy maintsy manakatra Azy. Tsy ho tonga eo amin'ny fisainantsika Izy; isika no tsy maintsy manakatra ny Fisainany. Tsy hihaino an'ireo didintsika Izy; isika no hihaino an'ireo Didiny.

<sup>82</sup> Fa, mazava ho azy, afaka manao fotsiny an'izay tiantsika hatao isika. Ary milaza an'izao amin'ny fanajana aho. Ny sivifolo isan-jaton'ireo pasitera, dia lasa tena malemy izy ireo, tsy hitory manohitra an'izany izy ireo. Tapakilan-tsakafo iray ho azy ireo izany. Aleoko maty noana tapany, ary mitafy gonim-bozaka mba hanarona ny fitanjahako, ka mitory ny Filazantsara, ny Fahamarinana, toy izay tsy maintsy hanana akoho voaendy intelo isan'andro nefa manao marimaritra iraisana amin'ny fakon'ny devoly. Lasa lehilahy antitra iray aho; ary nanohana an'izany aho fony aho lehilahy tanora iray. Te-hijoro mahery

fo kokoa aho ankehitriny, satria hitako fa antomotra ny ora. Inona no heverinareo ho nataon'ireo mpaminanin'ny Testamenta Taloha raha nitsangana izy ireo androany? Jereo ireo toerana!

<sup>83</sup> Ary ity lehilahy ity niaraka tamin'ny tavoahangin-divainy, nisotro, nanana fotoana goavana iray. Hoy izy hoe, "Iray minitra fotsiny. Ny rehetra, ianareo, ny rehetra henoy aho. Alefaso ny radio-nareo ankehitriny."

<sup>84</sup> Ireo fandaharana ratsy, maloto, zavatra feno loto izay navela, tsy voasivana! Oviana no nanomboka izany? Jereo manerana ny tantara. Nanomboka tany aoriana tany izany tamin'ny andron'i Clara Bow. Ary rehefa ity Texan mpanao tetidratsy, tsy masina ity no nandeha tany ka nanamboatra an'ireo atin'akanjom-behivavy izay nanao azy ireo ho toy ny mampiseho vatana, ary io no nanomboka. Ny hira ratsy voalohany navelan'izy ireo nandeha, dia mikasika an'ireo ramatoa nampidina ny bân-kirarony sy mampiseho ny lohaliny tsara tarehy. Nilamindamina tamin'izany izy ireo, ary ankehitriny dia tsy voasivana izany. Afaka milaza sy manao izay tiany hatao izy ireo. Ny devoly no naka an'ilay zavatra tsy misy tifi-basy iray. Marina izany. Inona no heverinareo ho nataon'ireo mpivarotena an'i Hollywood, ao amin'ny helo, amin'izao andro izao, raha afaka miverina izy ireo? Hanao an'izany ho hafa izy ireo. Saingy ny fitaomany eto amin'izao tontolo izao no nametraka an'izao tontolo izao tao anatin'ny lelafon'ny fahalòvana iray.

<sup>85</sup> Oh, isaorana anie ny Anaran'ny Tompo! Inona no tokony hataon'ny fitaoman'ilay Fiangonana Kristiana? Manao an'izao tontolo izao hirehitra miaraka amin'ny Kristianisma! Saingy, raha tokony ho izany, dia miezaka isika ny maka tahaka azy ireo. Kristy no ohatra ho antsika, fa tsy mpilalaon'ny Hollywood iray, na mpilalaon'ny televiziona iray.

<sup>86</sup> Saingy moderina isika. Mifoka an'ireo Pall Mall isika, ary handeha any amin'ny helo ianareo nohon'ny fanaovana an'izany. Ireo sarin'ireo zazavavy eto, miaraka amin'ny sigara, ireo vehivavy tsara tarehy, famitahana iray an'ny devoly izany. Jereo izy, taona vitsy aorian'ny nifohany, miaraka amin'ny TB, mandry any, eo am-pahafatesana, mahantra iray. Saingy moderina izany. Afaka mametraka an'izany eo anatrehan'ireo olona tanora izy ireo.

<sup>87</sup> Ary raha mametraka sary iray an'ny fanasitranana avy amin'Andriamanitra ianareo, na zavatra iray, na an'i Kristy, dia tsy hamela anareo hanao an'izany izy ireo.

<sup>88</sup> Saingy moderina isika. Tsy maintsy mandeha tahaka ny sisa amin'izao tontolo izao isika. Ireo takelaka lehibe an'ny labiera, ireo an'ny Oertel '92, sy ny an'ny Pabst Blue Ribbon, ary izy rehetra ireo. Inona no ataon'izy ireo? Mametraka an'izany eo amin'ireo fandaharan'ny televiziona izy ireo satria tsy mandoa hetra izany. Ny devoly no nanao an'izany tahaka an'izany.

89 O Andriamanitra, mamindrà fo. Tsy afaka mahita ve ianareo, ry havana, fa eo amin'ny faran'ny làlana isika?

90 Toy ny ahoana no nidiran'ny devoly tao amin'ireo zavatra ireo. Navelany izany satria fantany fa voaisa ireo androny.

91 Noho izany ity lehilahy tanora ity miaraka amin'ny vera divainy, manandratra an'izany ho an'ny fifandòm-bera. Oh, oadray! Hihevitra aho fa ireo lehilahy rehetra dia te-hihetsika tahaka azy.

92 Jereo ireo zazalahy kely any an-tsekoly, rehefa tsy maintsy hisintona an'ireo salopetiny manerana ny valahany izy ireo, ary hamela ny volony haniry tahaka ny andian'ny jiolahy, mba hihetsika tahaka an'i Elvis Presley.

93 Andriamanitra anie hitahy an'ilay zokiolon'ilay kolejy indray andro, izay nanao hoe, “Hanitsy sy hiakanjo tahaka ny lehilahy ianareo, raha tsy izany dia hivoaka avy amin'ity kolejy ity.” Izany no tena Amerikana iray. Hoy izy hoe, “Rehefa miakanjo tahaka an'izany izy ireo, dia mihetsika tahaka an'izany.” Ary marina izany.

94 Ary rehefa miakanjo tahaka ny mpivarotena iray ianareo, dia hihetsika tahaka ny anankiray. Oh, manana betsaka hatao ianareo, karazana fanahy inona no ao anatinareo. Izany tokoa. Izany no manao anareo hihetsika arak'izay ao anatinareo. Manao anareo hiakanjo izany, sy hihetsika, ary ho velona. Na inona na inona ao anatinareo, dia izany no mitondra anareo. Izany tokoa.

95 Fa ankehitriny dia manangana ny verany izy. Oh, ahoana fa tao amin'ny tsikiny lehibe fotsiny izy, ny fihetsehana keliny izay nataony teo anatrehan'ny olona rehetra. Tsy fandaharana tsara iray an'ny televiziony ve izany? Tsy ho—tsy ho nisafidy an'io hetsika io ve i Hollywood? “Oh, teneniko aminareo,” hoy izy, “izao no hataontsika. Fantatrareo ve io andiana holy-rollers izay nananantsika taloha teto io?” Hitanareo?

96 Ary saiky tamin'ny fotoana nanombohany nisotro mihitsy, dia nijery nankany amin'ny rindrina izy. Fantatrareo, tao amin'ilay saha, dia nisy fanaovan-jiro lehibe iray nihantona. Ary nisy lalotra sokay iray teo amin'ny rindrina. Ary nitaratra teo amin'io lalotra sokay io ireo jiro, avy teo amin'ilay saha. Ary nibontsina nivoaka ny masony. Ary nihovitrovitra tanteraka marina tokoa izy. Ny Baiboly no nilaza fa taitra izy, nilaza fa, “Niala tamin'ny toerany ireo taolany, ary niara-nifandona izy ireo.”

97 Eny, ary indray andro any, dia hihovitrovitra tanteraka ity firenena ity, tena azo antoka. Oh, eny. Azo antoka.

98 Hoy izy ireo hoe, “Ireo holy-rollers ireo, ireo mpanasitrana avy amin'Andriamanitra, izay, *ity, itsy*, ary ny *hafa*,” izay rehetra maha-izy azy ireo. Andraso fotsiny. Marina Andriamanitra.

<sup>99</sup> Handefa ny Hafatra Izy, na ahoana na ahoana. Nandefa Izy tao amin'ireo taona hafa rehetra. Hataony izany ankehitriny. Ary Ataony izany, ary efa saiky tapitra mihitsy ny fifohazana. Tsaroanareo, izany no HOY NY TOMPO HOE. Hoy aho hoe, "Nandray ny fanapahan-keviny farany i Amerika tamin'ny 1946." Diniho hatramin'io. Vita ny aminy. Ary tsy misy na inona na inona tavela afa-tsy fitsarana sy korontana. Jereo izay nitranga tao amin'io fotoana betsaka io. Diniho fotsiny izany, ahoana fa hitohy hiha-haingana sy hiha-haingana izany. Eo amin'ny farany isika. Miaina ao amin'ireo aloky Ny Fihaviany isika.

<sup>100</sup> "Ary hisy famantarana eny amin'ny lanitra ambony sy eto an-tany. Ketraka ny fon'ny olona; tahotra, fotoan'ny fahaverezan-kevitra; fahoriana eo amin'ireo firenena." "Ahoana fa ho kirina ny olona, mpieboebo!" "Ahoana fa ireo zanakavavin'i Ziona, ilay fiangonana, dia handeha hirehareha, mpieboebo; amin'ny fomba handehanany, ary mitsingintsingina sy miolanolana raha mandeha izy."

<sup>101</sup> Aiza no misy antsika? Miaraka amin'ny fety goavan'ny rock-and-roll an'i Beltesazara isika. Ary tratra tao anatin'ilay samonta ny fiangonana, tamin'ny alàlan'ny televiziona, tamin'ny alàlan'ny radio, tamin'ny alàlan'i Hollywood. Ary eo isika izao. Ireo tena vehivavy Kristiana dia manapaka ny volony, manao lokon-tarehy eo amin'ny tarehiny, miakanjo akanjo maloto ratsy kely, satria olona maloto saina no niteny tamin'izy ireo hoe tsy misy maharatsy an'izany.

<sup>102</sup> Vehivavy Kristiana iray, mpitory teny, no naniraka zazavavy iray teto indray andro, toy ny hoe natsoboka tao anatin'ny akanjony izy. Hoy izy hoe, "Oh, Ranadahy Branham, avy amin'ilay sekoly tranainy ianao. Ny pasiteranay dia manome fahafahana an'ireo vehivavy."

Hoy aho hoe, "Manafaka azy ireo amin'ny inona?"

<sup>103</sup> Manafaka azy ireo amin'i Kristy izy ireo ary fahamaotinana tsotra. Oh, tena malaza, izany ilay vehivavy. Izany tokoa. Fa ny zavatra rehetra izay manao an'izany dia zanaky ny helo iray. "Ny voany no hahafantaranareo azy ireo." Andro iray toy ny inona no iainantsika! Azo antoka. Izaho tsy mino... mahafantatra fa izany dia milaza hoe ahoana, karazana akanjo inona no anaovanareo, sy ny sisa. Fa, ry vehivavy, fantatrareo ve izay ataonareo? Manao ny tenanareo ho lasibatry ny filàna an'ny karilahy antitra mpanao ratsy rehetra izay mandalo ianareo. Nefa mila fanafahana ianareo. Izany no maneho hoe fanahy inona no ao anatinareo. Te-ho afaka amin'ny Fiangonana ianareo, afaka amin'i Kristy, afaka amin'ny Fanahy Masina, mba ahafahanareo miaina tahaka ny sisa amin'izy ireo. Tsy manilika ny Branham Tabernacle izany. Mampiditra ny Branham Tabernacle izany, ny rehetra! "Efa nanota izy rehetra

ka tsy nahatratra ny voninahitr'Andriamanitra.” Eto isika izao. Oh, andro iray toy ny inona! Fotoana iray toy ny inona!

<sup>104</sup> Ary nihovitrovitra tanteraka izy. Dia nijery izy, ary teo amin'ny rindrina dia nisy ampahan-tànan'Olonà iray. Ary Izany dia nanoratra teo amin'ny rindrina hoe, “MENE, MENE, TEKELA, OPARESINA.”

<sup>105</sup> Oh, nanomboka nandinika an'io Godfrey moderina izay nanana laza betsaka io izy rehetra ireo. Inona ny olana aminy? Nihovitrovitra tanteraka izy, tena azo antoka. Mitsangana izy... Hoy ny Baiboly hoe, “Niady ireo lohaliny.” Ary nisy zavatra nitranga. Inona? Tsy nety azony ilay izy. Nihevitra izy fa tsy nisy olona afaka nahatratra azy.

<sup>106</sup> Fa afaka mahatratra anareo Andriamanitra, tsy mampaninona izay misy anareo. Fantany ianareo. Fantany ireo asanareo.

<sup>107</sup> Noho izany dia hoy izy hoe, “Zavatra tokana ihany no hatao, izany dia, ny miantso an'ilay pasitera.” Noho izany dia lasa izy ary naka an'ilay pasitera, sy ilay kardinaly, ilay arseveka, ary ireo papan'ny fiangonany. Ary nentina niditra izy rehetra. Hoy izy hoe, “Inona no dikan'ity?” Ankehitriny dia hahita Amerika moderina iray ianareo. Tsy nahafantatra na inona na inona mikasika ny ivelan'ny voajanahary mihitsy izy ireo, noho izany dia tsy afaka nahazo an'izany izy ireo.

Isaorana anie ny Anaran'ny Tompo!

<sup>108</sup> Afaka hisalalala ve ianareo, arak'izany, raha hiantso ny Fanahin'Andriamanitra velona izy ireo hoe, “Mpanao hatsarana iray, na devoly iray?” Tsy mahafantatra na inona na inona mikasika ny ivelan'ny voajanahary izy ireo. Voarakotra tanteraka ao anatin'ny anaram-piangonany izy ireo. Tsy mahafantatra na inona na inona mikasika an'izany izy ireo. Hoy izy ireo hoe, “Oh, fifandraisana ara-tsaina kely iray fotsiny izany.” Fa eo amin'ny rindrina ilay sora-tànana.

<sup>109</sup> Nataony teo anatrehan'ny Jiosy io famantarana io, teo amin'ny fiafaran'ny azy ireo. Nataony teo anatrehan'ireo Samaritana izany, fa tsy ny Jentilisa. Nahoana? Tsy maintsy niandry Izy mandra-pahatongan'ny fahotan'ireo Amorita ho feno.

<sup>110</sup> Ankehitriny dia eo amin'ny rindrina ilay sora-tànana, ho antsika. Inona no ataon'izy ireo? Mihaino an'izany ve izy ireo? Tsia, tompoko. Manohy fotsiny miaraka amin'i Arthur Godfrey izy ireo, sy Elvis Presley, sy Pat Boone, ary ny sisa rehetra amin'izy ireo. Olona tanora moderina, adolantsento, herisetra, izany ilay zavatra iray ihany izay nisy tany, marina tokoa.

<sup>111</sup> Dia nentina ireo pasitera rehetra, ka hoy izy ireo hoe, “Eny, izahay, tsy fantatray Io. Angamba... Oh, aloka iray any ho any angamba io.”

<sup>112</sup> Nanana saina tsaratsara kokoa noho izany ilay mpanjaka. Dia hoy izy hoe, “Homeko ampahany iray an’ny fanjakako ny olona rehetra, ary hampiakango azy aho, ka hametraka rojo volamena iray eo amin’ny tendany, raha afaka mandika an’Io izy.” Saingy tsy nanana ny fanomezam-pahasoavan’ny fandikana izy ireo. Tsy nahafantatra na inona na inona mikasika an’izany izy ireo. Nino izy ireo fa efa lasa ireo andron’ny fahagagana.

<sup>113</sup> Tsy ireo mpitory tenintsika moderina ve izany? Tsy ireo mpanara-maso ambony antsika ve izany, ireo evekantsika? Tsy mahafantatra na inona na inona mikasika ny ivelan’ny voajanahary izy ireo. Izany no antony nahafahan’izy ireo niantso ny Fanahin’Andriamanitra velona hoe, “Hetsika iray; fanamboamboarana iray.”

<sup>114</sup> O Andriamanitra, mamindrà fo amin’ny taranaka iray mpijangajanga sy feno loto mihalevona avy amin’ny tavan’ny tany.

<sup>115</sup> Teo izy. Mbola mampifandona ny lohaliny foana izy. Nisy zavatra tsy nety tao. Fantany fa nisy zavatra tsy nety tao. Oh, nisy famantarana iray ivelan’ny voajanahary. “Ahoana no nidiran’Izany teto? Avy taiza Izany?” Avy any Ambony Izany. Nidina Izany, teo amin’izay tsy nisy rindrina. Afaka niditra Izany.

<sup>116</sup> Ary, amin’izao andro izao, dia nanao rock-and-roll isika. Nitondra an’ireo zanatsika nankeo amin’ireo televiziona sy fandaharana tsy voasivana isika. Navelantsika ho lasa feno an’ireo tantaram-pitiavana maloto ratsy, mampiseho vatana ireo gorodontsika sy latabatsika, raha tokony ho ny Tenin’Andriamanitra. Tsy misy ankizy eto amin’ity tanàna ity, izay tsy mahafantatra betsaka mikasika an’i Arthur Godfrey, na Elvis Presley, na Pat Boone, na David Crockett, noho ny ahafantaran’izy ireo ny amin’i Jesosy Kristy. Mahitsy izany, saingy izany dia, oh, tena marina.

<sup>117</sup> Tsy mahagaga raha misy fihemorana iray! Ary inona no fantatr’ireo pasitera? Tsy fantatr’izy ireo hoe inona no anton’izany. Izy ireo no anton’izany.

<sup>118</sup> Ary teo izy, nitsangana; toy izany koa i Beltesazara izay anton’izany, namela ny fanjakany hiditra tao amin’ny toerana iray tahaka an’izany.

<sup>119</sup> Ary, amin’izao andro izao, ao amin’io karazan-javatra rehetra izay andalovantsika io, dia nihevitra isika fa voaisy manda. Mihevitra isika hoe, “Isika no firenena tsara indrindra sy malaza indrindra eto an-tany. Manana ny siansa rehetra isika eto.”

<sup>120</sup> Ary kely no nahafantaran’i Beltesazara, hoe tsy nanana an’ireo siantifika rehetra izy. Nisy firenena iray nantsoina hoe ny “Mediana-sy-Persiana,” izy ireo dia nanana asa siantifika

iray, ihany koa (Izay ankehitriny dia ireo Mediana-sy-Persiana, na ireo Indiana, ireo Hindous any Inde, arak'izay vao avy notenenin'ny rahalahintsika; farany dia lasa izy ireo, nipetraka tany Inde, amin'ny maha-Hindou, Mediana-sy-Persiana.), ka nahita ara-tsiansa fomba iray izy ireo izay nahafahany nihodina ny renirano Eofrata. Tsy afaka namaky teo amin'ireo rindrina izy ireo, fa nihodina an'ilay renirano, ka tonga teo ambanin'ireo vavahady. Miasa any ho any ny siansa. Firenena mpanompo sampy malaza iray, tsy masina tamin'izany fotoana izany, ary nametraka takelaka iray teo amin'ny rindrina Andriamanitra, mba hampahafantatra azy ireo fa tapitra ny andron'izy ireo.

<sup>121</sup> Ary nametraka takelaka iray teo amin'ny rindrintsika sy ny fetin'ny rock-and-roll antsika lehibe Andriamanitra, ary misy sambon-danitra iray manidina manerana ny lanitra. Oh, nihevitra isika fa isika no nanana azy rehetra, sa tsy izany? Nihevitra isika fa isika no nahafantatra azy rehetra. Fa Rosia, araka ny siansantsika manokana, dia dimy taona mialoha antsika. Ary rehefa tratra isika, ao anatin'ny dimy taona, dia ho folo taona lavitra kokoa izy ireo amin'ny lalana hafa. Mamela firenena iray tsy masina Andriamanitra, mamela vahoaka iray tsy masina izay naka an'ireo siantifika Jiosy tany ireo, ary lavitra mialoha antsika izy ireo. Mametraka ny fotoantsika ho an'ny divay isika, ireo vehivavy, ary fotoana goavana. Nefa izy ireo miasa andro aman'alina, ahoana no hanapoahana antsika. Tsy misy zavatra anankiray izay afaka hanakana azy ireo tsy hanao an'izany izao ankehitriny izao. Jereo, ny toerana misy antsika, ilay firenena manontolo.

<sup>122</sup> Tsaroanareo ve ilay manamboninahitry ny tafika? Niresaka izaho sy Rahalahy Roberson omaly. Nifampiresaka taminy izy ireo, iray amin'ireo siantifika malaza. Hoy izy, "Tsy tiako hampitahotra ny olona ianao, fa tiako ianao hiteny aminay ny fahamarinana. Misy loza ve?"

"Amin'ny minitra rehetra dia mety hitranga izany."

<sup>123</sup> Ny zavatra tokana, dia mifamitaka fotsiny isika. Nanomboka nandefa an'ilay balafomanga kelintsika isika, ary mitsifotra izy, telo dian-tongotra niala tamin'ny tany. Ankehitriny dia mandefa anankiray hafa isika, ary mitsifotra izy. Nahoana? Nanapoizina ny saintsika tamin'ny sigara isika, tamin'ireo vehivavy, tamin'ny whisky, tamin'ny fotoana goavana, ka tsy nahafaly an'ilay Andriamanitry ny Lanitra izany. Ary milaza mialoha ny Soratra fa Rosia no hanao an'izany. Aiza no misy antsika? Eo amin'ny farany isika. Ny firenena tsirairay dia matahotra mafy. Mino aho fa afaka mametraka balafomanga iray izy ireo, izao ankehitriny izao, ka handrava ny firenena manontolo. Ao anatin'ny fotoana dimy minitra, dia tsy ho lasa afa-tsy vovoka izy, ary hiverina any amin'ireo entona izay nisy anareo tany amin'ny voalohany. Afaka manao an'izany izy ireo.

<sup>124</sup> Oh, nanana fetin'ny rock-and-roll iray isika. Nanadino an'Andriamanitra isika. Nandeha be loatra ho an'ny televiziona isika, be loatra ho an'izao tontolo izao. Ary efa niomana foana izy ireo, tahaka an'ireo Mediana-sy-Persiana mihitsy. Ary ankehitriny dia tonga ilay ivelan'ny voajanahary, ary eo amin'ny rindrina ilay sora-tànana; tsy eo amin'ny rindrina, fa eny amin'ny lanitra. Ary mihovitrovitra isika rehetra ankehitriny. Oh, eny. Mihovitrovitra ny siansa moderina antsika. Mihovitrovitra ny firenentsika. Mety hitranga alohan'ny hifaranan'ity fotoana ity izany.

<sup>125</sup> Fa tiako ianareo hanamarika iray hafa. Tiako ianareo habatsiaro fa raha mbola tao amin'izany toerana izany izy ireo, teo ambanin'io korontam-pisotroana io, dia nisy mpanjakavavy kely iray. Tsy tany amin'ilay fetin'ny rock-and-roll izy. Tsy maintsy tany ivelany izy namaky ny faminanian'i Daniela. Tsy tany izy nanaram-po tamin'ny fahotan'izy ireo. Dia nihazakazaka niditra izy. Rehefa tsy fantatr'ilay mpanjaka izay hatao, dia nihazakazaka niditra izy. Ary hoy izy hoe, "Oh, ry mpanjaka, ho velona mandrakizay anie ianao! Fantatro fa mihovitrovitra tanteraka ianao. Voaelingelina tanteraka ianao. Ary ny pasiteranao, ary tsy misy iray amin'ireo mpanolotsainao, ny papanao, sy ireo kardinalinao, sy ireo lehilahin'ny distrikanao, ary ireo mpanara-masonao ambony, tsy misy iray amin'izy ireo afaka mandika an'izany ho anao. Fa misy lehilahy iray, misy lehilahy iray ao amin'ny fanjakanao, mahafantatra ny ivelan'ny voajanahary izy."

<sup>126</sup> Oh, isaorana anie Ny Anarany! Ry fiangonana, misy Lehilahy iray eto afovoantsika, androany. Afaka mamaky an'ilay ivelan'ny voajanahary Izy, ary afaka manoratra an'ilay ivelan'ny voajanahary Izy. Misy Lehilahy iray. Oh, matoky aho fa hihaona Aminy ianareo. Matoky aho fa hiditra ao am-ponareo Izy izao ankehitriny izao. Hiresaka aminareo vehivavy Izy. Izy dia hiresaka amin'ny. . . ianareo lehilahy, ary hamela anareo hahita ny toerana izay misy anareo. Izy no Anankiray tokana Izay afaka mamaky ny toeranareo.

<sup>127</sup> Afaka hitory teny aho mandra-pahatongan'ny feoko tsy hisy intsony. Afaka hitomany aho mandra-pahatongan'ireo ranomaso hikoriana eo amin'ny takolako. Tsy hahasoa izany, satria olona iray fotsiny aho.

<sup>128</sup> Fa misy Lehilahy iray. Ny Anarany dia Jesosy. Afaka miteny aminareo Izy hoe inona no dikan'*Ity*. Tsy hihataka ve ianareo ka hiresaka Aminy kely fotsiny?

<sup>129</sup> Inona no dikan'ireo sambon-danitra eny amin'ny lanitra ireo? Inona ny olana? Inona ity Babylona moderina ity, izay ezahantsika hanamboarana milina iray hitondra antsika eny amin'ny volana? Tsy ho vitanareo mihitsy izany. Inona daholo izany? Tsy mahafantatra ny siansa. Ao amin'ny fahamaikana

ratsy ho an'ny zavatra iray izy ireo, nefa tsy fantany hoe inona ilay izy.

<sup>130</sup> Fa misy Lehilahy iray. Misy Lehilahy iray Izay mahafantatra ny rehetra mikasika an'izany. Izy no Anankiray Izay nanoratra an'izany *Eto*. Fantany hoe ahoana no hamakiana an'ity Teny ity. Oh, Fantany ny dikan'Izany, satria Izy no manana ny HOY NY TOMPO HOE. Izy no nampanantena an'izany. "Ireo asa izay Ataoko no hataonareo koa. Raha miantso Ahy izy ireo hoe, 'Belzeboba,' ilay andrianan'ny trano, tsy mihoatra noho izany ve no hiantsoan'izy ireo ny Ankohonany!"

<sup>131</sup> Eo amin'ny rindrina ilay sora-tànana; ireo sambon-danitra eny amin'ny lanitra. "Horohorontany lehibe hatraiza hatraiza; mipoitra ireo volkano; ireo onjan-tsamonta manapotika an'ireo morona." Inona izany? Ilay sora-tànana. Tsy teny amin'ny lanitra fotsiny ihany, fa eto an-tany. "Hisy famantarana eny amin'ny lanitra sy eto an-tany. Ketraka ny fon'ny olona."

"Oh, tsy fantatray izay hatao."

<sup>132</sup> "Fotoan'ny fahoriana; fahoriana." Inona ny fahoriana? Fahoriana eo amin'ireo firenena, izy rehetra ireo. Avelao hanidina fotsiny ny balafomanga anankiray, dia izany no manao an'ilay izy. Inona izany?

<sup>133</sup> "Misy lehilahy iray izay afaka mandika azy." Nandeha izy ary naka an'io lehilahy io.

<sup>134</sup> Andriamanitra anie hanome ahy tanjaka izao maraina izao, Andriamanitra anie hanome ahy hery; hitondra an'io Lehilahy io eo amin'izay ilainareo androany, hitondra Azy eo aminareo. Izy no Anankiray afaka mandika ny raharahanareo. Izy no Anankiray afaka miteny aminareo hoe taiza no nanaovanareo ny fahadisoanareo. Afaka Izy. Anankiray afaka miteny aminareo hoe taiza no nialanareo. Izy no Anankiray izay afaka miteny aminareo hoe aiza no hanombohana.

<sup>135</sup> Ary nandeha izy ka naka an'i Daniela, solontenan'Andriamanitra. Ary nanatona izy.

<sup>136</sup> Azonareo eritretina ve ny mpaminany masina iray nanao hoe, "Oh, ry mpanjaka, mahazo haja aho ny tonga eto. Oh, raha afaka milaza an'ilay zavatra marina fotsiny aho, dia ho azoko io rojo volamena io"?

<sup>137</sup> Oh, ianareo, afaka mahita ve ianareo hoe aiza no misy an'izany, androany? "Raha afaka mampifaly ny sofin'ny oloko aho, miala lavitra amin'ireo zavatra ireo. Tsy ahoako izay ataon'izy ireo; mandoa betsaka izy ireo ao amin'ilay-ilay fitehirizana. Izy ireo manao an'ity, *itsy*, na ny *hafa*. Hanorina fiangonana goavana be iray isika, ary hametraka tendron-tilikambo goavana iray eo amboniny. Isika dia hanao an'ity, *itsy*, na ny *hafa*."

138 O Andriamanitra, mamindrà fo amin'ny olona tahaka an'izany. Omeo ahy ny Fahamarinana. Eny. "Oh, raha miresaka zavatra tahaka an'izany isika, rahalahy, ny-hitsangana ny olontsika ka hivoaka." Tsy hanao izy ireo raha tia an'Andriamanitra. Ho tian'izy ireo ny handre an'izany.

139 Ny tena lehilahin'Andriamanitra iray dia tsy mijery an'ity lalana ity sy *itsy* lalana itsy. Tsy mijery izy mba hahita raha milaza ny olona iray hoe, "Tsara izany. Manao tsara ianao." Na mba hahita raha milaza ny olona iray hoe, "Oh, tsy tokony nanao an'izany ianao." Tsy ahoany izay lazain'ny olona. Mankasitraka ny fiarahan'ny Fanahy Masina izy, ary mijery ambony fotsiny dia manohy. Tsy ahoany izay lazain'ilay mpitory teny, na izay lazain'ny olona hafa. Mankasitraka ny fiarahan'ilay Anankiray Izay naniraka azy izy. Marina izany. Natao hahafaly Anankiray fotsiny Izy.

140 Jereo ity. Hoy izy hoe, "Oh, ry Beltesazara, tokony ho nahafantatra tsaratsara kokoa noho izao ianao. Tsy fantatrao ve ny rainao, Nebokadnezara..." Izay, ny raibeny marina tokoa. Hoy izy, "Tsy fantatrao ve ny rainao..." Satria, nisy fifandimbiasan'ireo mpanjaka. "Beltesazara, tsy mahafantatra tsaratsara kokoa ve ianao? Nanana ohatra iray ianao tany aoriana, ny amin'izay nataon'Andriamanitra tamin'ny rainao rehefa lasa kirina izy, mpieboebo, ary namela ny fanjakany handeha tahaka an'izany. Manana ohatra iray ny amin'izay Nataony ianao."

141 Ary toy izany koa no anananareo ohatra iray ny amin'izay nataon'Andriamanitra tamin'ireo izay tsy nandeha mahitsy teo Anatrehany. Tsy zavatra mahagaga ireo. Tsy Hafatra sarotra iray ity. Izany no Fahamarinana. Manana ohatra iray ianareo. Fantatrareo izay Nataony tany aoriana tany, tamin'ireo vehivavy izay nandihy teo anoloan'ireo sampy. Fantatrareo izay Nataony tamin'ireo lehilahy izay nanenjika an'ireo vehivavy vahiny. Fantatrareo izay Nataony tamin'ireo mpimamo tampina, sy ireo mpivady mitovy fananahana, ary ireo famadihan'i Sodoma. Tsy zavatra hafahafa izany. Fantatrareo ireo zavatra ireo.

142 Hoy izy, "Tokony ho nahafantatra an'izany ianao. Io ny ohatrao, avy amin'ny raibena. Fa, ankehitriny, izao no dikan'ilay soratra, 'Efa nanisa ny fanjakanao Andriamanitra. Voalanja eo amin'ny mizàna ianao ka hita fa maivana.'"

143 Oh, raha mba nisy fotoana iray izay ireo Metodista, Batista, Presbyterana, Loterana, Pentekotista, voalanja eo amin'ny mizàna izy ireo, mizànan'Andriamanitra, ka hita fa maivana! Izy ireo dia niantso ny Fanahin'ilay Andriamanitra velona hoe, "Zavatra tsy masina." Nanao tsinontsinona an'ireo asan'ny fahasoavana izy ireo. Nanaraka an'ireo fiangonana sy rafi-pandaminana goavana izy ireo. Ianareo Assemblées de Dieu, ianareo Fiangonan'Andriamanitra, ianareo rehetra, ianareo

an'ny tokana, sy an'ny telo, Batista, Presbyterana, Katolika, fantatrarao fa niverina nankany Babylona ianareo. Nanana ohatra iray an'izany ianareo.

144 Ary ity Branham Tabernacle ity dia mahafantatra fa efa nampitandremana ny amin'ireo zavatra ireo ianareo, taona maro lasa izay, fa ankehitriny dia voalanja eo amin'ny mizàna ianareo ka hita fa maivana: mifamaly, miady, mihazona lolom-po, ary mikorontana. Mihevitra ve ianareo fa afaka hiasa ao amin'ny toerana iray tahaka an'izany Andriamanitra? Tsia mihitsy. Eo ianareo izao.

145 “Tsy miraika, tsy masina, tsy manana fitiavana ara-boajanahary, mpanontolo fo, mpanendrikendrika.” Izany ilay andro izay iainantsika.

146 Fa tsarovy, hoy izy, “Fantatrao izany.” Fa tamin'io fotoana iray io ihany mihitsy, dia nanome ny faminaniany i Daniela ka niteny tamin'io mpanjaka io. Azonao eritreretina ve izy manindrahindra an'izany, mba hahazo rojo volamena iray? Azonao eritreretina ve ny lehilahin'Andriamanitra iray hanao marimaritra iraisana amin'ny devoly, mba halaza? Tsia mihitsy.

147 Afaka manana an'ireo televizionareo ianareo, ireo fandaharanareo. Afaka manana an'ireo fiangonanareo malaza ianareo. Afaka manana an'izay tianareo ianareo. Aza avela halaza aho, Andriamanitra, fa avelao aho hahitsy fo amin'ny Fanahy Masina, mba hiteny ny Fahamarinana. Tsy ahoako izay mitranga na lasa. Manana zavatra anankiray hatao isika, izany dia manatanteraka ny fanirahan'ny Tompontsika finaritra.

148 Fa eto isika izao. Ao amin'ity andro ity isika, ary eo ambonintsika izany. Tsy misy na inona na inona azo atao ankehitriny. Efa niampita an'ilay tsipika isika. Toerana iray toy ny inona! Mivangongo ao anatin'ny fahotana sy ny hadalana ny firenena. Eo amin'ny rindrina ilay sora-tànana. Ilay Fanahin'Andriamanitra manambara ny Tenany, ary miverina ny olona ka manao hoe, “Belzeboba Izany.”

149 Hoy Jesosy hoe, “Niteny . . . niteny an'izany nanohitra Ahy, dia hamela anareo Aho. Fa rehefa tonga ny Fanahy Masina, na dia teny anankiray manohitra an'izany aza dia tsy ho avela mihitsy, amin'ity fiainana ity na ny fiainana ho avy.” Ohatra tsara iray an'izany tamin'ny Pentekosta, taorian'ny Pentekosta; ary avy eo rehefa i Titus, tamin'ny 96, no naka an'ireo mandan'i Jerosalema; rehefa nolavin'izy ireo ilay hafatra. Izany tokoa.

150 Eto isika izao. Ary tamin'ilay fotoana iray ihany izay nanomezana ny faminaniana mihitsy. Henoy ankehitriny, eo am-pamaranana. Raha mbola nomena ilay faminaniana, dia inona no niseho? Inona no niseho? Tamin'ilay fotoana iray ihany izay nanomezana ny faminaniana, dia tonga teo ambanin'ny vavahady ireo Mediana-sy-Persiana. Efa novonoina

ireo mpiambin'ny tempoly. Norasarasaina ireo mpiambina ny lapan'andriana, teny an-dàlambe.

<sup>151</sup> Henoy. Folo minitra taty aoriana, ireo tovovavy moderina ireo, tsara tarehy, ireo vehivavy moderina lavitra an'ireo zazakeliny sy ny zanany, inona no nitranga? Inona no niseho? Nahantona teny an-dàlambe izy ireo. Naolan'ireo miaramila izy ireo. Notatahana ny kibon'izy ireo. Ary ilay fahafaham-baraka izay nentina teo amin'izy ireo, satria diso tamin'ny fihainoana izy ireo. Saingy efa lavitra loatra ilay izy.

<sup>152</sup> Henoy, ry sakaiza. Tsy misy zavatra iray amin'izao ora izao mihitsy, ao anatin'ny dimy amby roapolo minitra manaraka, na folo minitra, hanakana an'i Rosia tsy handefa ny zanabolany ka hanidina hitety an'ity firenena ity, hampitodika ny balafomangany, hanao hoe, "Aoka hitolo-batana, raha tsy izany dia tsy hisy afa-tsy vovoka ianareo afaka roa minitra." Afaka manao an'izany izy ireo izao ankehitriny izao. Eritrereto izany. Afaka manao an'izany izy ireo izao ankehitriny izao. Inona no hitranga? Andiana fiaramanidina sy andiana fiaramanidina, andiana sambo sy andiana sambo, an'ny miaramila kominista tsy masina, no hameno ny tanintsika, handramby an'ireo zazavavintsika ka hitondra azy ireo eny an-dàlambe, ary hitondra azy ireo tahaka ny biby fiompy, hanindrona sabatra iray eo amin'izy ireo. Miditra ao an-tranontsika ary maka an'ireo vadintsika, ka manakapoka ny lohan'ilay zazakely amin'ny rindrina, manolana an'ireo vehivavintsika. Milaza zavatra anankiray ve ianareo? Azy ireo izany.

<sup>153</sup> Hoy ianareo hoe, "Hitolo-batana ve ny Pentagone antsika?" Azo antoka, hitolo-batana izy. Izany no ho zavatra mitombina tokana hataony. Tsy maintsy hanao an'izany izy. Raha tsy izany, dia tsy hisy afa-tsy vovoka isika afaka minitra vitsy. Hanana ora vitsy amboniny hiainana angamba isika, saingy famonoana iray toy ny inona!

<sup>154</sup> Inona? Mety hiakatra eo amin'ireo fiaramanidina izy ireo izao ankehitriny izao. Mety ao amin'ny seranana ireo sambo. Tsy ho ela dia mety ho zava-misy iray ireo zavatra izay resahantsika ireo. Tsy misy zavatra anankiray tavela, mba hitrangan'izany, mba hisakana azy tsy hitranga araka ny faminiana. Eo isika izao. Ary amin'ny herinandro manaraka dia tsy fantatrareo hoe toerana inona no mety hisy anareo. Eo amin'ny rindrina ilay sora-tànana. Voalanja eo amin'ny mizàna isika ka hita fa maivana.

<sup>155</sup> Ankehitriny, raha marina ireo zavatra ireo, ka hitanareo fa marina izy ireo, amin'izay fotoana izay dia akaiky toy ny ahoana ny Fihavian'ny Tompo? Rahariva, dia te-hanohy aho. Inona? Ho aiza ilay Fianganana rehefa miseho izany? Ankehitriny, ianareo izay efa nieritreritra foana fa handalo ny Fahoriambe ilay Fianganana, tongava jereo. Raha tena

akaiky io, raha tena akaiky io fandravàna io, dia akaiky toy ny ahoana ny Fihavian'ny Tompo? Satria izany dia hiseho alohan'ilay Fiangonana mihitsy... Alohan'ny hamelezan'ny bala anankiray an'ity firenena ity, dia ho eo an-tsandrin'i Kristy ilay Fiangonana, ary lasa. Eo amin'ny farany isika. Mety hitranga amin'ny fotoana rehetra izany.

Ndao isika hivavaka.

<sup>156</sup> Tiako ny olona misaina lalina ato. Tiako ireo izay... mahafantatra marina tokoa fa efa niresaka taminareo io Lehilahy io tao anatin'ny minitra vitsy farany. Manao hoe, "Eny, diso aho. Ary te-hahitsy aho, amin'io Lehilahy io, satria Izy irery no Anankiray tokana Izay afaka mamaky an'io sora-tànana io. Te-hahitsy aho." Hanangana ny tãnanareo fotsiny ve ianareo? Manaova hoe, "Mivavaha ho ahy, Rahalahy Branham."

<sup>157</sup> Andriamanitra hitahy anao, tompoko. Andriamanitra hitahy anao, ramatoa. Andriamanitra hitahy anao, tompoko. Andriamanitra hitahy anao, ry lehilahy tanora. Andriamanitra hitahy anao, ramatoa; ianao, ianao. Marina izany. Andriamanitra hitahy anao. Andriamanitra hitahy anao, tompoko. Andriamanitra hitahy anao, ilay ramatoa tanora. Andriamanitra hitahy anao, ry vehivavy tanora. Andriamanitra hitahy anao, ry zazavavy. Andriamanitra hitahy anao, ry zazavavy kely ery aoriana ery, ilay zazavavy adolantsento kely. Ilay zazalahy kely, Andriamanitra hitahy anao. Ao anatin'ny fiovam-piainana fotsiny ianao.

<sup>158</sup> Oh, mety hitranga izany, ary hitranga izany. Tsy maintsy hitranga izany. Ary ireo kofehy marefo izay andehananao ireo dia ho tapaka, malala. Ary ny fanahinao mahantra tsy afa-manotra, inona no hitranga aminao? Tsy hisy andro intsony. Hitsonika ao amin'ny Mandrakizay ny fotoana amin'izay fotoana izay. Ilay sora-tànana eo amin'ny rindrina; porofo siantifika iray. Miezaka handeha eny amin'ny volana izy ireo, tahaka ny nataon'izy ireo tany Babylona. Miverimberina ny zavatra rehetra. Ilay Andriamanitry ny Lanitra dia tsy afaka mihazona ny Filaminany intsony. Iza no fotoana. Rahoviana? Tsy fantatro; fa izao no fotoana.

Mandainga ireo mpaminany sandoka, lavin'izy  
ireo ny Fahamarinan'Andriamanitra,  
Hoe Jesosy ilay Kristy no Andriamanitsika;  
Voaisa ireo andron'ny Jentilisa ireo, miaraka  
amin'ny tahotra manarona;  
"Miverena, O ry niely, amin'ny anareo manokana."

Akaiky ny andron'ny fanavotana,  
Raiki-tahotra ny fon'ny olona;  
Aoka ho fenoina ny Fanahy ianareo, ny fanilonareo  
ho voadio sy hazava,  
Miandrandra, akaiky ny fanavotana anareo.

159 Efa tara noho izay heverinareo izao. Tsy ho tianareo ve izao ankehitriny izao, eo ambanin'ny faharesen-dahatra, raha tsapanareo fa diso ianareo; tsy ahoako na hafiriana no nikambananareo tamin'ity tabernakla ity, tsy ahoako na hafiriana no nikambananareo tamin'ny fiangonanareo, impiry ianareo no niteny tamin'ny fiteny tsy fantatra, impiry ianareo no nandihy tao amin'ny Fanahy; raha mbola afaka mahita an'izao tontolo izao mihantona eo aminareo foana ianareo, dia tongava eto iray minitra fotsiny. Tongava eto, ry ondry very. “Miverena, O ry niely, amin'ny anareo manokana.” Ho avy eto iray minitra fotsiny ve ianareo, hamela ahy handray ny tãnanareo? Mitsangàna eto, ary ndao isika hiaraka hivavaka. Manasa anareo aho. Mitsangàna avy hatrany miala amin'ny sezanareo ankehitriny ka tongava eto; liana amin'ny fivavako ianareo. Manasa anareo aho ho tonga.

160 Marina izany. Ny Tompo hitahy anao, ry rahalahy malalako. Mitsangàna eto amin'ny alitara eto mihitsy vetivety fotsiny. Andriamanitra hitahy anao, ramatoa. Andriamanitra hitahy anao. Andriamanitra hitahy anao, rahalahy. Ho tahiana ianao. Andriamanitra hitahy anao, ry rahalahiko. Andriamanitra hitahy anareo, ianareo roa. Andriamanitra hitahy anao, rahalahy. Andriamanitra hitahy anao. Mitsangàna eto amin'ny alitara eto mihitsy ankehitriny. Andriamanitra hitahy anao.

161 [Elanelana tsy voaraki-peo—Mpand.]... nandray an'izany teo no ho eo. Raha samy vahiny isika, dia atsangano ny tãnanao. Izany no tsy mety aminao, sa tsy izany? Eny àry. Manana finoana ianao. Avy any Kentucky any ianao. Andriamanitra hitahy anao. Ny Fanahy Masina!

162 Andriamanitra hitahy anao, ramatoa. Andriamanitra hitahy anao, ramatoa. Andriamanitra hitahy anao. Andriamanitra hitahy anao, ramatoa.

Ny andron'ny fanavotana . . .

163 Andriamanitra hitahy anao, ramatoa. Andriamanitra hitahy anareo, ianareo roa. Andriamanitra hitahy anao, rahalahy. Andriamanitra hitahy anao, ranabavy. Andriamanitra hitahy anao. Andriamanitra hitahy anao, ranabavy.

[Elanelana tsy voaraki-peo—Mpand.] “. . .famakiana saina”?

164 Raha tsy izany no Fanahin'i Kristy, dia tsy fantatro hoe aiza no misy Azy. Nahoana àry ianareo no mijanona sy miandry? Tsy afaka mahita ve ianareo fa Izy Izany? “Ireo zavatra izay Ataoko, no hataonareo koa.” Ary izany no famantaran'ny andro farany. Henoy Izany, rahariva, ka jereo raha tsy izany no famantaran'ny andro farany.

165 Avia, sitrakareo ve? Ianareo izay mino fa Andriamanitra no niresaka tamin'ny fonareo, izao maraina izao, manao

hoe, “Tokony ho menatra ianao manao an’ireo zavatra izay nataonao,” hanatona ve ianareo?

“Eny,” hoy ianareo, “halako ny—ny anabaviko hahita ahy.”

<sup>166</sup> Ahoana ny amin’ny Tomponareo? Oh, te-ho voavonjy ianareo, tsy te-handeha any amin’ny helon’ny devoly ianareo, nefa tsy handray Azy ho Tomponareo. *Tompo* dia “mpanapaka.” Ny Tompo no mifehy ny rehetra. Te-hanana ny fiainana kelinareo manokana ianareo. Te-hiaina ny fiainana Kristiana amin’ny fomba tianareo iainana ianareo, fa tsy hiaina an’izany amin’ny fomba Tiany hiainanareo. Avelao Izy hiditra ao am-ponareo. Ary manaova hoe, “Oh, izaho—namela Anao tato am-poko aho, Jesosy, ho Mpanonjiko, eny; saingy tsy namela Anao hifehy mihitsy aho, satria te-hihetsika kely tahaka an’izao aho. Te-ho moderina aho.” Oh, tsy Tomponareo Izy, tsy mbola. Ny fanahin’i Elvis Presley sy Godfrey no mbola mihazona anareo; ny devoly. Azo antoka. Tsy ho avy eo amin’izay ihetsehan’i Kristy ve ianareo? Jereo Ny Fanahiny.

Fanahy mamy, rakofy ny fanahiko.

Rakofy ny fanahiko . . .

<sup>167</sup> Tsy hivavaka ve ianareo? Fantatro fa mihevitra ianareo hoe izaho dia . . . misy zavatra tsy mety amiko. Fa, rehefa afaka mahita ny fiangonana aho, sy ny tsy fahalinan’ily fiangonana! Inona no heverinareo fa hiseho raha—raha George Washington, tamin’ny androny, no nahita an’ily zavatra iray ihany miseho izay vao niseho teto mihitsy? Inona no heverinareo ny amin’ireo lehilahy marina, sy ireo lehilahy malazan’ireo taona lasa, ho nataony? Rehefa nihorakoraka teny anankiray i Charles G. Finney hoe, “Mibebaha fa raha tsy izany dia ho levona,” ary torana teny an-dàlambe ny olona.

<sup>168</sup> Ary, androany, dia afaka mametraka an’ily soratra eo amin’ny rindrina ny Fanahy Masina, ka maneho ny Tenany manatrika, ary mipetraka eo ireo lehilahy ka mijery manodidina, ireo vehivavy? Oh, fangatsiahana izany. Fa tsarovy, “Tahaka ny tamin’ny andron’i Noa, nisy valo voavonjy, dia ho toy izany koa amin’ny fihavian’ny Zanak’olona.”

<sup>169</sup> Ny fanasanareo dia, “Avia.” Manasa anareo ho eto amin’ny alitara miaraka amin’ny sisa amin’izy ireo aho. Raha fantatrareo fa nanao ratsy ianareo, dia nahoana ianareo no tsy avy? Mitsangàna eto, aseho an’Andriamanitra fa manaiky hanao ezaka iray ianareo. Fa raha tsy afaka ny Fanahy Masina, amin’izay fotoana izay dia fantatro fa tsy afaka aho.

Noho izany dia ndao isika hanondrika ny lohantsika ankehitriny.

<sup>170</sup> Te-hanolotra vavaka ho an’ity vehivavy ity aho. Manangana ny tànany izy, eto ambonin’ily fandrian’ny marary.

<sup>171</sup> Ry anabaviko, afaka mamonjy ny ainao Jesosy Kristy, ao amin'io taona antitra io, hitanareo. Mino ve ianareo fa hamonjy Izy? Ary fantatrareo tsara ve izany? Raha Mpanompony aho... Nilaza Izy ao amin'Ny Teniny hoe, "Mitenena amin'io tendrombohitra io hoe, 'Mifindrà,' ka aza misalalasa, fa mino fa izay nolazainareo dia hiseho, dia afaka mahazo an'izay lazainareo ianareo." Hanompo Azy mandritry ny fiainanao rehetra ve ianao? [Hoy ilay anabavy hoe, "Hanompo aho."—Mpand.] Omeo Azy irery ny sisa amin'ny andronao.

<sup>172</sup> Tompo Andriamanitra, raha mihazona ny tãnan'ity vehivavy izay mandry eto ity aho, eo am-pahafatesana, mety tsy haharitra hatramin'ny asam-panasitranana rahariva akory aza izy raha tsy manampy azy Ianao. Mahita azy malemy loatra aho mba hipetraka mihitsy aza; tsy maintsy mandry izy. Nefa avy eo dia hoy Ianao hoe, "Ny vavaky ny finoana no hamonjy an'ilay marary. Andriamanitra no hanangana azy ireo." Mivavaka aho mba Hanasitrananao an'ilay vehivavy izao ankehitriny izao. Ary ao amin'ny foko mahantra, satria fantatro fa eto Ny Fanahinao, dia milaza amin'ilay aretin'ny vatany aho hoe, "Mialà, amin'ny Anaran'i Jesosy Kristy, mba ahafahan'ny anabavinay ho velona." Manomboka amin'ity ora ity, dia enga anie handeha ny fijaliana sy ny fahalemena. Enga anie izy ho salama, ho an'ny voninahitr'Andriamanitra. Amin'ny alàlan'ny Anaran'i Jesosy Kristy.

<sup>173</sup> Efa voalaza ny Teny. Ny tanjoko sy ny antoko, araka ny fantatro, dia marina. Noho izany, tsy izaho izany; Izy izany. Noho izany, dia handeha hanao ny asako aho, hifaly. Adinoy ny rehetra mikasika ny hoe marary. Mitsangàna, ary ento ny fandrianao, mandehana mody, mifaly. Mijanòna ho an'ny fotoana, rahariva, diniho ny Tompo Andriamanitra.

<sup>174</sup> O Andriamanitra, mitsangana eo afovoan'ity oran'ny fahafatesana ity, fahafatesana ho an'ny fahotana, fahafatesana ho an'ny tsy firaikana, fahafatesana ho an'ny aretina, ny fialan'ireo rofy; Ny Fanahinao lehibe eto, mandika ny toeran'izy ireo! Mivavaka aho ho an'ireo izay mitsangana eo amin'ny alitara, izay mahafantatra fa azo antoka ilay sora-tànana eo amin'ny rindrina. Tsy voatery handray ny teniko ho an'izany izy ireo. Manana Ny Teninao izy ireo ankehitriny. Manana ny tenin'ny gazety izy ireo. Manana ny tenin'ireo siantifika izy ireo. Ary fantatray, Aminao, izay Andriamanitra marina iray, dia tsy afaka hamela an'i Babylona handeha ao amin'ny toeran'izy ireo Ianao raha tsy manome azy ireo ny fitsarany, ary Ianao koa dia tsy hamela anay handeha raha tsy mahazo ny fitsaranay izahay.

<sup>175</sup> Ary mivavaka izahay izao maraina izao, Ray, mba ho afa-mandositra an'io fitsarana io ireo izay mitsangana eto, raha manatona voaro eo ambanin'ny sandrin'i Jesosy izy ireo. Satria tonga hihaino an'ilay Lehilahy izay afaka mandika an'ilay arapanahy izy ireo, ilay ivelan'ny voajanahary. Efa nandre Ny

Feonao niteny izy ireo, ary tonga mba hihaino Anao. Rehefa niteny Ianao, dia nitsangana avy teo amin'ny sezany izy ireo. Tonga izy ireo. Tsy menatra izy ireo. Ny sasany amin'izy ireo, Tompo, dia efa Kristiana ela be, saingy izy ireo dia—tsy menatra izy ireo ny hijoro vavolombelona fa diso izy ireo. Ary hoy Ianao hoe, “Raha hanambara Ahy eo anatrehan'ny olona ianareo, dia hanambara azy eo anatrehan'ny Ray sy ireo Anjely masina Aho.” Mamindrà fo Ianao, O Andriamanitra Mandrakizay, ka omeo Fiainana Mandrakizay ireo izay mitady an'Izany ankehitriny. Enga anie ny fon'izy ireo sarobidy ho afa-po amin'ny fahatsaran'Andriamanitra. Atolotro Anao izy ireo, Tompo.

<sup>176</sup> Nanao zavatra izy ireo izao ankehitriny izao izay nanohitra an'ireo lalàn'ny siansa rehetra. Nitsangana avy teo amin'ny sezany izy ireo ary nandeha teto. Nitsangana ny tàn'an'izy ireo; maneho fa misy fanahy iray ao anatin'izy ireo, mihetsika. Ary io fanahy izay manetsika azy ireo io, dia resy lahatra, amin'ny alàlan'ny Tenin'Andriamanitra, fa diso izy ireo. Ireo fihetsiny no nanaporofa fa manaiky izy ireo hoe diso izy ireo. Ary nanaja sy naneho fanajana betsaka izy ireo, mendrika hajaina, mba hanatona ny alitara, mba hiaiky ny fahadisoany sy hangataka famindrampo. Tsy handà azy ireo mihitsy Ianao. Ekeo, Tompo, mba ho feno Ny Fanahinao ny tsirairay avy ankehitriny. Amin'ny Anaran'Ny Zanakao, ny Tompo Jesosy.

Ankehitriny raha mbola manondrika ny lohantsika isika.

<sup>177</sup> Manontany aho, ianareo izay mitsangana eto, izao maraina izao, hoe tsapanareo fa nanao an'ilay zavatra tsara ianareo. Tonga eo amin'ilay fanasana ianareo, tsy avy amin'ny rahalahinareo, fa tonga eo amin'ny fanasan'ilay Andriamanitra lehibe, masina ianareo. Ary satria nanao an'izany ianareo, ary Ny Fanahiny no niantso anareo hanaiky fa efa diso ianareo, ka te-hahitsy ianareo. Ary ianareo efa nivavaka Taminy Izay nanao hoe, “Raha tsy manam-pahendrena ny olona iray, dia aoka izy hangataka amin'Andriamanitra. Angataho amin'ny Ray ny zavatra rehetra, amin'Ny Anarako, dia Hataoko izany.” Tonga miaraka amin'io fo tso-po io, ny finoanareo dia mifototra am-panajana eo amin'ny Tenin'Andriamanitra, mino ve ianareo fa azonareo izay angatahanareo ankehitriny? Raha tianareo, miaraka amin'ny lohanareo miondrika, dia hanangana ny tàn'anareo amin'Andriamanitra fotsiny ve ianareo, hanao hoe, “Mino aho ankehitriny.” Andriamanitra hitahy anareo. Tsara izany. “Mino aho ankehitriny fa hitako izay nangatahako.”

<sup>178</sup> Enga anie ny fahasoavan'Andriamanitra hampanan-karena hatrany ny fanahinareo, hitahy ny fanahinareo, ka hanao anareo ho Azy Mandrakizay, ao amin'ny Fanjakana, ao amin'ilay tontolo izay ho avy. Enga anie ny . . . Tsy hiala aminareo mihitsy ny Fahasoavany Mandrakizay. Enga anie Izy hanohana anareo amin'ireo oran'ny fakam-panahy. Ary raha hamely ilay baomba

lehibe, ary tonga ilay fotoana lehibe, dia enga anie ianareo ho hakarina ao amin'ny fampakarana Ny Fiangonany voatahy, mba hiaraka Aminy mandrakizay.


<sup>179</sup> Ianareo ao amin'ny mpanatrika, miaraka amin'ny lohanareo miondrika, ka te-ho tsarovana ao amin'ny vavaka ianareo, na dia tsy nanatona aza ianareo ka te-ho tsarovana, dia hanangana ny tãnanareo ve ianareo. Efa . . . Andriamanitra hitahy anareo. Fantatrareo ve . . . Jereo fotsiny ireo tãnana, ny sivifolo isanjaton'ny mpanatrika.

<sup>180</sup> Fantatrareo ve fa izao no fotoan'ny fandinihan-tena iray? Izao no fotoana iray izay tsy maintsy handinihantsika tena. Mety ho ity no hafatry ny Filazantsara farany izay voatory. Alohan'ny hanombohan'ny hafatra rahariva, fantatrareo, dia mety hamely ny tany io baomba io. Tsy misy zavatra anankiray hanakana an'izany tsy ho toy izany. Voalamina izy ireo. Vonona izy ireo. Ny ilain'izany dia fisotroana Vodka vitsivitsy, ary indro fa tonga izany. Ary ny zavatra tokana izay manakana an'izany, izao ankehitriny izao, dia ny fahasoavan'Andriamanitra izay miezaka manakambana Ny Fiangonany. Tsy hihaino ahy amin'ny maharahalahinareo ve ianareo? Henoy ireo Soratra, amin'ny maha-Mpamonjinareo, ka aoka Kristy no ho Mpanapaka faratampony ao amin'ny fiainanareo. Ekeo izany, raha mivavaka isika.

<sup>181</sup> Mivavaha ankehitriny, ny tsirairay avy, amin'ny fanaonareo manokana. Raha Batista iray ianareo, dia mivavaha amin'ny fomba ivavahan'ireo Batista. Tsy manao fahasamihafana mihitsy izany. Mivavaha fotsiny ianareo. Hoy ianareo hoe, "Andriamanitra anie . . ." Tsy fotoana hiadian-kevitra amin'ireo anaram-piangonana ankehitriny; efa nihoatra an'izany taona izany isika. Isika dia . . .

Avia, rahalahy.

<sup>182</sup> Raha mbola mitsangana eto isika. Tsy mety amin'ny evanjelista . . . Fa, tsy isalasalana, afaka kelikely, dia hisy fanaovana batisa iray. Ny Alahadin'ny Paska dia mikasa ny ho eto aho ho an'ny batisa goavana iray. Ary raha tsy nandray an'i Kristy mihitsy ianareo ka nasitrika tamin'ny Anaran'i Jesosy Kristy Tompo, ary maniry ny hatao batisa amin'ny fanitrihana ianareo, dia manasa anareo ho tonga izahay. Na dia izao ankehitriny izao aza, raha tianareo, dia vonona izahay.

<sup>183</sup> Tsy maintsy manana zavatra ho lazaina ny pasitera. Hangataka azy aho hivavaka an'ity vavaka ity, raha miandry isika. Eny àry, Rahalahy Neville. 

58-0309M Ilay Sora-tànana Eo Amin'Ny Rindrina  
Branham Tabernacle  
Jeffersonville, Indiana U.S.A.

MALAGASY

©2026 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Filazana fahefan'ny tompon'ny boky

Tsy azo adika. Ity boky ity dia azo atao printy amin'ny fanaovam-  
printy ao an-trano ho an'ny fampiasana manokana na ho zaraina, tsy  
misy sarany, ho fitaovana iray hanaparitahana ny Filazantsaran'i Jesosy  
Kristy. Ity boky ity dia tsy azo amidy, na adika indray amin'ny refy  
lehibe, na alefa amin'ny siteweb iray, na tehirizina amin'ny fomba  
nisy nanesorana, na adika amin'ny fiteny hafa, na ampiasaina ho  
fangataham-bola raha tsy misy alàlana voasoratra mazava avy amin'ny  
Voice Of God Recordings®.

Ho an'ny fanazavana fanampiny na ho an'ny fitaovana hafa efa azo  
raisina, dia iangaviana hifandray amin'ny:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)